


|      |           |
|------|-----------|
| 内閣文庫 |           |
| 番號   | 漢 1836    |
| 冊數   | 500 (146) |
| 函號   | 別 10 1    |





陳書卷二十八

列傳第二十二 淺草文庫

唐散騎常侍姚思廉撰

世祖九王

高宗二十九王

後主十一子

世祖十

沈皇后生廢帝始興王伯茂叢淑媛生翻

陽

伯恭番谷華生新安王伯固劉昭華



生衡陽王伯信王充華生廬陵王伯仁張脩容生江夏王伯義韓脩華生武陵王伯禮江貴妃生永陽王伯智孔貴妃生桂陽王伯謀其伯固犯逆別有傳二男早卒本書無名

始興王伯茂字鬱之世祖第二子也初高祖兄始興昭烈王道談仕於梁世爲東宮直閣將軍侯景之亂領弩手二千援臺於城中中流矢卒紹泰二年追贈侍中使持節都督南兗州諸軍事南兗州刺史封義興郡公謚曰昭烈高祖受禪重贈驃騎大將軍太傅揚州牧改封始興郡王邑二千戶王生世祖及高宗高宗以梁承聖

末遷于關右至是高祖遙以高宗襲封始興嗣王以奉昭烈王祀永定三年六月高祖崩是月世祖入纂帝位時高祖在周未還世祖以本宗乏饗其年十月下詔曰日者皇基肇建封樹枝戚朕親地攸在特啓大邦弟項嗣承門祀雖土宇開建薦饗莫由重以遭家不造閔凶夙邁儲貳遐隔轉車未返猥以眇身膺茲景命式循龜鼎冰谷載懷今旣入奉太宗事絕藩裸始興國廟蒸嘗無主瞻言霜露感尋慟絕其徒封嗣王項爲安成王封第二子伯茂爲始興王以奉昭烈王祀賜天下爲父後者爵一級庶申罔極之情永保山河之祚舊制諸王受



封未加戎號者不置佐史於是尚書八座奏曰夫增崇徽號飾表車服所以闡彰厥德下變民望第二皇子新除始興王伯茂體自尊極神姿明穎玉暎鵬展蘭芬綺歲清暉美譽日茂月升道鬱平河聲超衮植皇情追感聖性大深以本宗闕緒纂承藩嗣雖珪社是膺而戎章未襲豈所以光崇睿哲寵樹皇枝臣等參議宜加寧遠將軍置佐史詔曰可尋除使持節都督南琅邪彭城二郡諸軍事彭城太守天嘉二年進號宣惠將軍揚州刺史伯茂性聰敏好學謙恭下士又以太子母弟世祖深愛重之是時征北軍人於丹徒盜發晉郗曇墓大獲晉

右將軍王羲之書及諸名賢遺跡事覺其書竝沒縣官藏于秘府世祖以伯茂好古多以賜之由是伯茂大工草隸甚得右軍之法三年除鎮東將軍開府儀同三司東揚州刺史廢帝卽位時伯茂在都劉師知等矯詔出高宗也伯茂勸成之師知等誅後高宗恐伯茂扇動朝廷光大元年乃進號中衛將軍令入居禁中專與廢帝遊處是時四海之望咸歸高宗伯茂深不平日夕憤怨數肆惡言高宗以其無能不以為意及建安人蔣裕與韓子高等謀反伯茂竝陰豫其事二年十一月皇太后令黜廢帝為臨海王其日又下令曰伯茂輕薄爰自弱



齡辜負嚴訓彌肆凶狡常以次居介弟宜秉國權不涯  
年德逾逞狂躁圖爲禍亂扇動宮闈要招麤險觖望臺  
閣嗣君喪道由此亂階是諸凶德咸作謀主允宜罄彼  
司甸刑斯剉人言念皇支尚懷悲憫可特降爲溫麻侯  
宜加禁止別遣就第不意如此言增滋歎時六門之外  
有別館以爲諸王冠婚之所名爲婚第至是命伯茂出  
居之於路遇盜殞于車中時年十八

鄱陽王伯山字靜之世祖第三子也偉容儀舉止閑雅  
喜愠不形於色世祖深器之初高祖時天下草創諸王  
受封儀注多闕及伯山受封世祖欲重其事天嘉元年

七月丙辰尚書八座奏曰臣聞本枝惟允宗周之業以  
弘盤石旣建皇漢之基斯遠故能協宣五運規範百王  
式固靈根克隆卜世第三皇子伯山發睿德於齡年表  
岐姿於卅日光昭丹掖暉映青闈而玉圭未秉金錫靡  
駕豈所以敦序維翰建樹藩戚臣等參議宜封鄱陽郡  
王詔曰可乃遣散騎常侍度支尚書蕭睿持節兼太宰  
告于太廟又遣五兵尚書王質持節兼太宰告于大社  
其年十月上臨軒策命之曰於戲夫建樹藩屏翼獎王  
室欽若前典咸必由之惟爾夙挺珪璋坐知孝敬令德  
茂親僉譽所集啓建大邦寔惟倫序是用敬遵民瞻錫



此圭瑞往欽哉其勉樹聲業永保宗社可不慎歟策訖  
敕令王公已下竝醺於王第仍授東中郎將吳郡太守  
六年爲緣江都督平北將軍南徐州刺史天康元年進  
號鎮北將軍高宗輔政不欲令伯山處邊光大元年徙  
爲鎮東將軍東揚州刺史太建元年徵爲中衛將軍中  
領軍六年又爲征北將軍南徐州刺史尋爲征南將軍  
江州刺史十一年入爲護軍將軍加開府儀同三司仍  
給鼓吹并扶後主卽位進號中權大將軍至德四年出  
爲持節都督東揚豐二州諸軍事東揚州刺史加侍中  
餘竝如故禎明元年丁所生母憂去職明年起爲鎮衛

大將軍開府儀同三司給班劍十人三年正月薨時年  
四十伯山性寬厚美風儀又於諸王最長後主深敬重  
之每朝廷有冠婚饗醺之事恒使伯山爲主及丁所生  
母憂居喪以孝聞後主嘗幸吏部尚書蔡徵宅因徃弔  
之伯山號慟殆絕因起爲鎮衛將軍仍謂羣臣曰鄱陽  
王至性可嘉又是西第之長豫章已兼司空其亦須遷  
太尉未及發詔而伯山薨尋值陳亡遂無贈諡長子君  
範太建中拜鄱陽國世子尋爲貞威將軍晉陵太守未  
襲爵而隋師至是時宗室王侯在都者百餘人後主恐  
其爲變乃竝召入令屯朝堂使豫章王叔英總督之而



又陰為之備及六軍敗績相率出降因從後主入關至長安隋文帝竝配于隴右及河西諸州各給田業以處之初君範與尚書僕射江總友善至是總贈君範書五言詩以敘他鄉離別之意辭甚酸切當世文士咸諷誦之大業二年隋煬帝以後主第六女女嫺為貴人絕愛幸因召陳氏子弟盡還京師隨才敘用由是竝為守宰遍於天下其年君範為溫令

晉安王伯恭字肅之世祖第六子也天嘉六年立為晉安王尋為平東將軍吳郡太守置佐史時伯恭年十餘歲便留心政事官曹治理太建元年入為安前將軍中

護軍遷中領軍尋為中衛將軍揚州刺史以公事免四年起為安左將軍尋為鎮右將軍特進給扶六年出為安南將軍南豫州刺史九年入為安前將軍祠部尚書十一年進號軍師將軍尚書右僕射十二年遷僕射十三年遷左僕射十四年出為安南將軍湘州刺史未拜至德元年為侍中中衛將軍光祿大夫丁所生母憂去職禎明元年起為中衛將軍右光祿大夫置佐史扶竝如故三年入關隋大業初為成州刺史太常卿衡陽王伯信字孚之世祖第七子也天嘉元年衡陽獻王昌自司還朝於道薨其年世祖立伯信為衡陽王奉



獻王祀尋為宣惠將軍丹陽尹置佐史太建四年為中  
護軍六年為宣毅將軍揚州刺史尋加侍中散騎常侍  
十一年進號鎮前將軍太子詹事餘竝如故禎明元年  
出為鎮南將軍西衡州刺史三年隋軍濟江與臨汝侯  
方慶竝為西衡州刺史王勇所害事在方慶傳

廬陵王伯仁字壽之世祖第八子也天嘉六年立為廬  
陵王太建初為輕車將軍置佐史七年遷冠軍將軍中  
領軍尋為平北將軍南徐州刺史十二年為翊左將軍  
中領軍禎明元年加侍中國子祭酒領太子中庶子三  
年入關卒于長安長子番先封湘濱侯隋大業中為咨

陽令

江夏王伯義字堅之世祖第九子也天嘉六年立為江  
夏王太建初為宣惠將軍東揚州刺史置佐史尋為宣  
毅將軍持節散騎常侍都督合霍二州諸軍事合州刺  
史十四年徵為侍中忠武將軍金紫光祿大夫禎明三  
年入關遷于瓜州於道卒長子元基先封湘潭侯隋大  
業中為穀熟縣令

武陵王伯禮字用之世祖第十子也天嘉六年立為武  
陵王太建初為雲旗將軍持節都督吳興諸軍事吳興  
太守在郡恣行暴掠驅錄民下逼奪財貨前後委積百



姓患之大建九年爲有司所劾上曰壬年少未達治道皆由佐史不能匡弼所致特降軍號後若更犯必致之以法有司不言與同罪十一年春被代徵還伯禮遂遷延不發其年十月散騎常侍御史中丞徐君敷奏曰臣聞車履不俟君命之通規夙夜匪懈臣子之恒節謹案雲旗將軍持節都督吳興諸軍事吳興太守武陵王伯禮昔擅英猷久馳令問惟良寄重粉鄉是屬聖上愛育黔黎留情政本共化求瘼早赴皇心遂復稽緩歸驂取移涼燠邊回去鶴空淹載路淑慎未彰違惰斯在繩愆檢迹以爲懲戒臣等參議以見事免伯禮所居官以王

遷第謹以白簡奏聞詔曰可禎明三年入關隋大業中爲散騎侍郎臨洮太守

永陽王伯智字策之世祖第十二子也少敦厚有器局博涉經史太建中立爲永陽王尋爲侍中加明威將軍置佐史尋加散騎常侍累遷尚書左僕射出爲使持節都督東揚豐二州諸軍事平東將軍領會稽內史至德二年入爲侍中翊左將軍加特進禎明三年入關隋大業中爲岐州司馬遷國子司業

桂陽王伯謀字深之世祖第十三子也太建中立爲桂陽王七年爲明威將軍置佐史尋爲信威將軍丹陽尹



十年加侍中出爲持節都督吳興諸軍事東中郎將吳興太守十一年加散騎常侍至德元年薨子豐嗣大業中爲番禾令

高宗四十二男柳皇后生後主彭貴人生始興王叔陵曹淑華生豫章王叔英何淑儀生長沙王叔堅宣都王叔明魏昭容生建安王叔卿錢貴妃生河東王叔獻劉昭儀生新蔡王叔齊袁昭容生晉熙王叔文義陽王叔達新會王叔坦王姬生淮南王叔彪巴山王叔雄吳姬生始興王叔重徐姬生尋陽王叔儼淳于姬生岳陽王叔慎王脩華生武昌王叔虞韋脩容生湘東王叔平施

姬生臨賀王叔敖沅陵王叔興曾姬生陽山王叔宣楊姬生西陽王叔穆申婕妤生南安王叔儉南郡王叔澄岳山王叔韶太原王叔匡袁姬生新興王叔純吳姬生巴東王叔謨劉姬生臨海王叔顯秦姬生新寧王叔隆新昌王叔榮其皇子叔叡叔忠叔弘叔毅叔訓叔武叔處叔封等八人並未及封叔陵犯逆別有傳三子早卒本書無名

豫章王叔英字子烈高宗第三子也少寬厚仁愛天嘉元年封建安侯太建元年改封豫章王仍爲宣惠將軍都督東揚州諸軍事東揚州刺史五年進號平北將軍



南豫州刺史十一年爲鎮前將軍江州刺史後主卽位  
進號征南將軍尋加開府儀同三司中衛大將軍餘竝  
如故四年進號驃騎大將軍禎明元年給鼓吹一部班  
劍十人其年遷司空三年隋師濟江叔英知石頭軍戍  
事尋令人屯朝堂及六軍敗績降于隋將韓擒虎其年  
入關隋大業中爲涪陵太守長子弘至德元年拜豫章  
國世子

長沙王叔堅字子成高宗第四子也母本吳中酒家隸  
高宗微時嘗往飲遂與通及貴召拜淑儀叔堅少傑黠  
凶虐使酒尤好數術卜筮祝禁鑿金琢玉竝究其妙天  
嘉中封豐城侯太建元年立爲長沙王仍爲東中郎將  
吳郡太守四年爲宣毅將軍江州刺史置佐史七年進  
號雲麾將軍郢州刺史未拜轉爲平越中郎將廣州刺  
史尋爲平北將軍合州刺史八年復爲平西將軍郢州  
刺史十一年入爲翊左將軍丹陽尹初叔堅與始興王  
叔陵竝招聚賓客各爭權寵甚不平每朝會鹵簿不肯  
爲先後必分道而趨左右或爭道而鬪至有死者及高  
宗弗豫叔堅叔陵等竝從後主侍疾叔陵陰有異志乃  
命典藥吏曰切藥刀甚鈍可礪之及高宗崩倉卒之際  
又命其左右於外取劍左右弗悟乃取朝服所佩木劍



以遙叔陵怒叔堅在側聞之疑有變伺其所爲及翌日  
小歛叔陵袖剉藥刀趨進斫後主中項後主悶絕于地  
皇太后與後主乳母樂安君吳氏俱以身捍之獲免叔  
堅自後扼叔陵擒之弁奪其刀將殺之間後主曰卽盡  
之爲待也後主不能應叔陵舊多力須臾自奮得脫出  
雲龍門入于東府城召左右斷青溪橋道放東城囚以  
充戰士又遣人往新林追其所部兵馬仍自被甲着白  
布帽登城西門招募百姓是時衆軍竝緣江防守臺內  
空虛叔堅乃白太后使太子舍人司馬申以後主命召  
蕭摩訶令討之卽日擒其將戴洸譚騏驎等送臺斬于

尚書閣下持其首徇于東城叔陵惟擾不知所爲乃盡  
殺其妻妾率左右數百人走趨新林摩訶追之斬于丹  
陽郡餘黨悉擒其年以功進號驃騎將軍開府儀同三  
司揚州刺史尋遷司空將軍刺史如故是時後主患創  
不能視事政無大小悉委叔堅決之於是勢傾朝廷叔  
堅因肆驕縱事多不法後主由是疎而忌之孔範管城  
施又慶之徒竝東宮舊臣日夜陰持其短至德元年乃  
詔令卽本號用三司之儀出爲江州刺史未發尋有詔  
又以爲驃騎將軍重爲司空實欲去其權勢叔堅不自  
安稍怨望乃爲左道厭魅以求福助刻木爲偶人衣以



陳書卷二十八 列傳 十一  
道士之服施機關能拜跪晝夜於日月下醮之祝詛於  
上其年冬有人上書告其事案驗竝實後主召叔堅囚  
于西省將殺之其夜令近侍宣敕數之以罪叔堅對曰  
臣之本心非有他故但欲求親媚耳臣既犯天憲罪當  
萬死臣死之日必見叔陵願宣明詔責於九泉之下後  
主感其前功乃赦之特免所居官以王還第尋起爲侍  
中鎮左將軍二年又給鼓吹油幢車三年出爲征西將  
軍荊州刺史四年進號中軍大將軍開府儀同三司禎  
明二年秩滿還都三年入關遷于瓜州更名叔賢叔賢  
素貴不知家人生產至是與妃沈氏酤酒以傭保爲事

隋大業中爲遂寧郡太守

建安王叔卿字子弼高宗第五子也性質直有材器容  
貌甚偉太建四年立爲建安王授東中郎將東揚州刺  
史七年爲雲麾將軍郢州刺史置佐史九年進號平南  
將軍湘州刺史後主卽位進號安南將軍又爲侍中鎮  
右將軍中書令遷中書監禎明三年入關隋大業中爲  
都官郎上黨通守

宜都王叔明字子昭高宗第六子也儀容美麗舉止和  
弱狀似婦人太建五年立爲宜都王尋授宣惠將軍置  
佐史七年授東中郎將東揚州刺史尋爲輕車將軍衛



尉卿十三年出爲使持節雲麾將軍南徐州刺史又爲侍中翌右將軍至德四年進號安右將軍禎明三年入關隋大業中爲鴻臚少卿

河東王叔獻字子恭高宗第九子也性恭謹聰敏好學太建五年立爲河東王七年授宣毅將軍置佐史尋爲散騎常侍軍師將軍都督南徐州諸軍事南徐州刺史十二年薨年十三贈侍中中撫將軍司空諡曰康簡子孝寬嗣孝寬以至德元年襲爵河東王禎明三年入關隋大業中爲汶城令

新蔡王叔齊字子肅高宗第十一子也風彩明瞻博涉經史善屬文大建七年立爲新蔡王尋爲智武將軍置佐史出爲東中郎將東揚州刺史至德二年入爲侍中將軍佐史如故禎明元年除國子祭酒侍中將軍佐史如故三年入關隋大業中爲尚書主客郎

晉熙王叔文字子才高宗第十二子也性輕險好虛譽頗涉書史大建七年立爲晉熙王尋爲侍中散騎常侍宣惠將軍置佐史進號輕車將軍揚州刺史至德元年授持節都督江州諸軍事江州刺史二年遷信威將軍督湘衡武桂四州諸軍事湘州刺史禎明二年秩滿徵爲侍中宣毅將軍佐史如故未還而隋軍濟江破臺城



隋漢東道行軍元帥秦王至于漢口時叔文自湘州還朝至巴州乃率巴州刺史畢寶等請降致書於秦王曰竊以天無二日晦明之序不差土無二王尊卑之位乃別今車書混壹文軌大同敢披丹款申其屈膝秦王得書因遣行軍吏部柳莊與元帥府僚屬等往巴州迎勞叔文叔文於是與畢寶荊州刺史陳紀及文武將吏赴于漢口秦王竝厚待之置于賓館隋開皇九年三月衆軍凱旋文帝親幸溫湯勞之叔文與陳紀周羅暉荀法尚等并諸降人見于路次數日叔文從後王及諸王侯將相并乘輿服御天文圖籍等竝以次行列仍以鐵騎圍之隨晉王秦王等獻凱而入列于廟庭明日隋文帝坐于廣陽門觀叔文又從後主至朝堂南文帝使內史令李德林宣旨責其君臣不能相弼以致喪亡後主與其羣臣竝慙懼拜伏莫能仰視叔文獨欣然而有自得之志旬有六日乃上表曰昔在巴州已先送款乞知此情望異常例文帝雖嫌其不忠而方欲懷柔江表乃授開府拜宜州刺史

淮南王叔彪字子華高宗第十三子也少聰慧善屬文太建八年立爲淮南王尋位侍中仁威將軍置佐史禎明三年入關卒于長安



始興王叔重字子厚高宗第十四子也性質朴無伎藝高宗崩始興王叔陵爲逆誅死其年立叔重爲始興王以奉昭烈王後至德元年爲仁威將軍揚州刺史置佐史二年加使持節都督江州諸軍事江州刺史禎明三年入關隋大業中爲太府少卿卒

尋陽王叔儼字子思高宗第十五子也性凝重舉止方正後主卽位立爲尋陽王至德元年爲侍中仁武將軍置佐史禎明三年入關尋卒

岳陽王叔慎字子敬高宗第十六子也少聰敏十歲能屬文太建十四年立爲岳陽王時年十一至德四年拜侍中智武將軍丹陽尹是時後主尤愛文章叔慎與衡陽王伯信新蔡王叔齊等日夕陪侍每應詔賦詩恒被嗟賞禎明元年出爲使持節都督湘衡桂武四州諸軍事智武將軍湘州刺史三年隋師濟江破臺城前刺史晉熙王叔文還至巴州與巴州刺史畢寶荊州刺史陳紀竝降隋行軍元帥清河公楊素兵下荆門別遣其將龐暉將兵畧地南至湘州城內將士莫有固志剋日請降叔慎乃置酒會文武僚吏酒酣叔慎歎曰君臣之義盡於此十長史謝基伏而流涕湘州助防遂興侯正理在坐乃起曰主辱臣死諸君獨非陳國之臣乎今天下



有難實是致命之秋也縱其無成猶見臣節青門之外  
有死不能今日之機不可猶豫後應者斬衆咸許諾乃  
刑牲結盟仍遣人詐奉降書於龐暉暉信之克期而入  
叔慎伏甲待之暉令數百人屯于城門自將左右數十  
人入于廳事俄而伏兵發縛暉以徇盡擒其黨皆斬之  
叔慎坐于射堂招合士衆數日之中兵至五千人衡陽  
太守樊通武州刺史鄔居業皆請赴難未至隋遣中牟  
公薛胄爲湘州刺史聞龐暉死乃益請兵隋又遣行軍  
總管劉仁恩救之未至薛胄兵次鵝羊山叔慎遣正理  
及樊通等拒之因大合戰自旦至于日昃隋軍迭息迭  
戰而正理兵少不敵於是大敗胄乘勝入城生擒叔慎  
是時鄔居業率其衆自武州來赴出橫橋江聞叔慎敗  
績乃頓于新康口隋總管劉仁恩兵亦至橫橋據水置  
營相持信宿因合戰居業又敗仁恩虜叔慎正理居業  
及其黨與十餘人秦王斬之于漢口叔慎時年十八  
義陽王叔達字子聰高宗第十七子也太建十四年立  
爲義陽王尋拜仁武將軍置佐史禎明元年除丹陽尹  
三年入關隋大業中爲內史至絳郡通守  
巴山王叔雄字子猛高宗第十八子也太建十四年立  
爲巴山王禎明三年入關卒于長安



武昌王叔虞字子安高宗第十九子也太建十四年立  
為武昌王尋為壯武將軍置佐史禎明三年入關隋大  
業中為高苑令

湘東王叔平字子康高宗第二十子也至德元年立為  
湘東王禎明三年入關隋大業中為湖蘇令

臨賀王叔敖字子仁高宗第二十一子也至德元年立  
為臨賀王尋為仁武將軍置佐史禎明三年入關隋大  
業初拜儀同三司

陽山王叔宣字子通高宗第二十二子也至德元年立  
為陽山王禎明三年入關隋大業中為涇城令

西陽王叔穆字子和高宗第二十三子也至德元年立  
為西陽王禎明三年入關卒于長安

南安王叔儉字子約高宗第二十四子也至德元年立  
為南安王禎明三年入關卒于長安

南郡王叔澄字子泉高宗第二十五子也至德元年立  
為南郡王禎明三年入關隋大業中為靈武令

沅陵王叔興字子推高宗第二十六子也至德元年立  
為沅陵王禎明三年入關隋大業中為給事郎

岳山王叔韶字子欽高宗第二十七子也至德元年立  
為岳山王尋為智武將軍置佐史四年除丹陽尹禎明



三年入關卒于長安

新興王叔純字子共高宗第二十八子也至德元年立為新興王禎明三年入關隋大業中為河北令

巴東王叔謨字子軌高宗第二十九子也至德四年立為巴東王禎明三年入關隋大業中為岍陽令

臨海王叔顯字子明高宗第三十子也至德四年立為臨海王禎明三年入關隋大業中為鶉鯀令

新會王叔坦字子開高宗第三十一子也至德四年立為新會王禎明三年入關隋大業中為涿令

新寧王叔隆字子遠高宗第三十二子也至德四年立為新寧王禎明三年入關卒于長安

新昌王叔榮字子徹高宗第三十三子也禎明二年立為新昌王三年入關隋大業中為內黃令

太原王叔匡字子佐高宗第三十四子也禎明二年立為太原王三年入關隋大業中為壽光令

後主二十二男張貴妃生皇太子深會稽王莊孫姬生吳興王胤高昭儀生南平王嶷呂淑媛生永嘉王彥邵

陵王競龔貴嬪生南海王虔錢塘王恬張淑華生信義王祗徐淑儀生東陽王恮孔貴人生吳郡王蕃其皇子

總觀明綱統冲洽縉綽威辯十一人並未及封



皇太子深字承源後主第四子也少聰慧有志操容止儼然雖左右近侍未嘗見其喜愠以母張貴妃故特爲後主所愛至德元年封始安王邑二千戶尋爲軍師將軍揚州刺史置佐史禎明二年皇太子胤廢後主乃立深爲皇太子三年隋師濟江六軍敗績隋將韓擒虎自南掖門入百僚逃散深時年十餘歲閉閣而坐舍人孔伯魚侍焉隋軍排閣而入深使宣令勞之曰軍旅在途不乃勞也軍人咸敬焉其年入關隋大業中爲枹罕太守

吳興王胤字承業後主長子也太建五年二月乙丑生

于東宮母孫姬因產卒沈皇后哀而養之以爲己子時後主年長未有胤嗣高宗因命以爲嫡孫其日下詔曰皇孫初誕國祚方熙思與羣臣共同斯慶內外文武賜帛各有差爲父後者賜爵一級十年封爲永康公後主卽位立爲皇太子胤性聰敏好學執經肄業終日不倦博通大義兼善屬文至德二年躬出太學講孝經講畢又釋奠於先聖先師其日設金石之樂於太學王公卿士及太學生並預宴是時張貴妃孔貴嬪並愛幸沈皇后無寵而近侍左右數於東宮往來太子亦數使人至后所後主疑其怨望甚惡之而張孔二貴妃又日夜構



成后及太子之短孔範之徒又於外合成其事禎明二年廢爲吳興王仍加侍中中衛將軍三年入關卒于長安

南平王嶷字承嶽後主第二子也方正有器局年數歲風采舉動有若成人至德元年立爲南平王尋除信武將軍南琅邪彭城二郡太守置佐史遷揚州刺史進號鎮南將軍尋爲使持節都督郢荆湘三州諸軍事征西將軍郢州刺史未行而隋軍濟江禎明三年入關卒于長安

永嘉王彥字承懿後主第三子也至德元年立爲永嘉王尋爲忠武將軍南徐州刺史進號安南將軍授散騎常侍使持節都督江巴東衡三州諸軍事平南將軍江州刺史未行隋師濟江禎明三年入關隋大業中爲襄武令

南海王虔字承恪後主第五子也至德元年立爲南海王尋爲武毅將軍置佐史進號軍師將軍禎明二年出爲平北將軍南徐州刺史三年入關隋大業中爲涿令信義王祗字承敬後主第六子也至德元年立爲信義王尋爲壯武將軍置佐史授使持節都督智武將軍琅邪彭城二郡太守禎明三年入關隋大業中爲通議郎



邵陵王競字承檢後主第七子也禎明元年立爲邵陵王邑一千戶尋爲仁武將軍置佐史三年入關隋大業中爲國子監丞

會稽王莊字承肅後主第八子也容貌最陋性嚴酷數歲左右有不如意輒剗刺其面或加燒爇以毋張貴妃有寵後主甚愛之至德四年立爲會稽王尋爲翊前將軍置佐史除使持節都督揚州諸軍事揚州刺史禎明三年入關隋大業中爲會昌令

東陽王恠字承厚後主第九子也禎明二年立爲東陽王邑一千戶未拜三年入關隋大業中爲通議郎

吳郡王蕃字承廣後主第十子也禎明二年封吳郡王三年入關隋大業中爲涪城令

錢塘王恬字承恢後主第十一子也禎明二年立爲錢塘王邑一千戶三年入關卒于長安

江左自西晉相承諸王開國竝以戶數相差爲大小三品大國置上中下三將軍又置司馬一人次國置中下二將軍小國置將軍一人餘官亦准此爲差高祖受命自永定訖于禎明唯衡陽王昌特加殊寵至五千戶其餘大國不過二千戶小國卽千戶而舊史殘缺不能別知其國戶數故綴其遺事附于此



史臣曰世祖高宗後主竝建藩屏以樹懿親固乃本根  
隆斯盤石鄱陽王伯山有風采德器亦一代令藩矣岳  
陽王叔慎屬社稷傾危情哀家國竭誠赴敵志不圖生  
嗚呼古之忠烈致命斯之謂也

陳書卷二十六終

陳書卷二十九

列傳第二十三

唐散騎常侍姚思廉撰

宗元饒

司馬申

毛喜

蔡徵

宗元饒南郡江陵人也少好學以孝敬聞仕梁世釋褐

康熙二十五年重修

陳書卷二十九

列傳

一



本州主簿遷征南府行參軍仍轉外兵參軍及司徒王  
僧辯幕府初建元饒與沛國劉師知同爲主簿高祖受  
禪除晉陵令人爲尚書功論郎使齊還爲廷尉正遷大  
僕卿領本邑大中正中書通事舍人尋轉廷尉卿加通  
直散騎常侍兼尚書左丞時高宗初卽位軍國務廣事  
無巨細一以咨之臺省號爲稱職遷御史中丞知五禮  
事時合州刺史陳裒贓汙狼籍遣使就渚斂魚又於六  
郡乞米百姓甚苦之元饒劾奏曰臣聞建旗求瘼實寄  
廉平褰帷恤隱本資仁恕如或貪汙是肆徵賦無狀天  
網雖疎茲焉弗漏謹案鍾陵縣開國侯合州刺史臣裒

因藉多幸預逢抽擢爵由恩被官以私加無德無功坐  
尸榮貴譙肥之地久淪非所皇威剋復勃仰仁風新邦  
用輕彌俟寬惠應斯作牧其寄尤重爰降曲恩祖行宣  
室親承規誨事等言提雖廉潔之懷誠無素蓄而稟茲  
嚴訓可以厲精遂乃擅行賦斂專肆貪取求粟不馱愧  
王沈之出賑徵魚無限異羊續之懸枯寘以嚴科實惟  
明憲臣等參議請依旨免裒所應復除官其應禁錮及  
後選左降本資悉依免官之法遂可其奏吳興太守武  
陵王伯禮豫章內史南康嗣王方泰竝驕蹇放橫元饒  
案奏之皆見削黜元饒性公平善持法諳曉故事明練



治體吏有犯法政不便民及於名教不足者隨事糾正  
多所裨益遷貞威將軍南康內史以秩米三千餘斛助  
民租課存問高年拯救乏絕百姓甚賴焉以課最入朝  
詔加散騎常侍荆雍湘巴武五州大中正尋以本官重  
領尚書左丞又爲御史中丞歷左民尚書右衛將軍領  
前將軍吏部尚書太建十三年卒時年六十四詔贈侍  
中金紫光祿大夫官給喪事

司馬申字季和河內溫人也祖慧遠梁都水使者父玄  
通梁尚書左民郎申早有風槩十四便善弈棋嘗隨父  
候吏部尚書到仲舉時梁州刺史陰子春領軍朱异在

焉子春素知申卽於坐所呼與對奕申每有妙思异觀  
而奇之因引申遊處梁邵陵王爲丹陽尹以申爲主簿  
屬太清之難父母俱沒因此自誓菜食終身梁元帝承  
制起爲開遠將軍遷鎮西外兵記室參軍及侯景寇郢  
州申隨都督王僧辯據巴陵每進籌策皆見行用僧辯  
歎曰此生要韃汗馬或非所長若使撫衆守城必有奇  
績僧辯之討陸納也申在軍中于時賊衆奄至左右披  
靡申躬蔽僧辯蒙楯而前會裴之橫救至賊乃退僧辯  
顧申而笑曰仁者必有勇豈虛言哉除散騎侍郎紹泰  
初遷儀同侯安都從事中郎高祖受禪除安東臨川王



諮議參軍天嘉三年遷征北諮議參軍兼廷尉監五年  
除鎮東諮議參軍兼起部郎出爲戎昭將軍江乘令甚  
有治績入爲尚書金部郎遷左民郎以公事免太建初  
起爲貞威將軍征南鄱陽王諮議參軍九年除秣陵令  
在職以清能見紀有白雀巢于縣庭秩滿頃之預東宮  
賓客尋兼東宮通事舍人遷員外散騎常侍舍人如故  
及叔陵之肆逆也事既不捷出據東府申馳召右衛蕭  
摩訶帥兵先至追斬之因入城中收其府庫後主深嘉  
之以功除太子左衛率封文始縣伯邑四百戶兼中書  
通事舍人尋遷右衛將軍加通直散騎常侍以疾還第  
就加散騎常侍右衛舍人如故至德四年卒後主嗟悼  
久之下詔曰慎終追遠欽若舊則闔棺定諡抑乃前典  
故散騎常侍右衛將軍文始縣開國伯申忠肅在公清  
正立已治繁處約投軀殉義朕任寄情深方康庶績奄  
然化往傷惻于懷可贈侍中護軍將軍進爵爲侯增邑  
爲五百戶諡曰忠給朝服一具衣一襲剋日舉哀喪事  
所須隨由資給及葬後主自製誌銘辭情傷切卒章曰  
嗟乎天不與善殲我良臣其見幸如此申歷事三帝內  
掌機密至於倉卒之間軍國大事指麾斷決無有滯留  
子琇嗣官至太子舍人



毛喜字伯武滎陽武人也祖稱梁散騎侍郎父栢忠  
梁尚書比部侍郎中權司馬喜少好學善草隸起家梁  
中衛西昌侯行參軍尋遷記室參軍高祖素知於喜及  
鎮京口命喜與高宗俱往江陵仍勅高宗曰汝至西朝  
可諮稟毛喜喜與高宗同謁梁元帝卽以高宗爲領直  
喜爲尚書功論侍郎及江陵陷喜及高宗俱遷關右世  
祖卽位喜自周還進和好之策朝廷乃遣周弘正等通  
聘及高宗反國喜於郢州奉迎又遣喜入關以家屬爲  
請周冢宰宇文護執喜手曰能結二國之好者卿也仍  
迎柳皇后及後主還天嘉三年至京師高宗時爲驃騎  
將軍仍以喜爲府諮議參軍領中記室府朝文翰皆喜  
詞也世祖嘗謂高宗曰我諸子皆以伯爲名汝諸兒宜  
用叔爲稱高宗以訪于喜喜卽條牒自古名賢杜叔英  
虞叔卿等二十餘人以啓世祖世祖稱善世祖崩廢帝  
冲昧高宗錄尚書輔政僕射到仲舉等知朝望有歸乃  
矯太后令遣高宗還東府當時疑懼無敢措言喜卽馳  
入謂高宗曰陳有天下日淺海內未夷兼國禍併鍾萬  
邦危懼皇太后深惟社稷至計令王入省方當共康庶  
績比德伊周今日之言必非太后之意宗社之重願加  
三思以喜之愚須臾聞奏無使姦賊得肆其謀竟如其



策右衛將軍韓子高始與仲舉通謀其事未發喜請高宗曰宜簡選人馬配與子高并賜鐵炭使脩器甲高宗驚曰子高謀反即欲收執何為更如是邪喜荅曰山陵始畢邊寇尚多而子高受委前朝名為杖順然甚輕狎恐不時授首脫其稽誅或愆王度宜推心安誘使不自疑圖之一壯士之力耳高宗深然之卒行其計高宗即位除給事黃門侍郎兼中書舍人典軍國機密高宗將議北伐勅喜撰軍制凡十三條詔頒天下文多不載尋遷太子右衛率右衛將軍以定策功封東昌縣侯邑五百戶又以本官行江夏武陵桂陽三王府國事太建三

年丁母憂去職詔追贈喜母庾氏東昌國太夫人賜布五百匹錢三十萬官給喪事又遣員外散騎常侍杜緬圖其墓田高宗親與緬案圖指畫其見重如此尋起為明威將軍右衛舍人如故改授宣遠將軍義興太守尋以本號入為御史中丞服闋加散騎常侍五兵尚書參掌選事及眾軍北伐得淮南地喜陳安邊之術高宗納之即日施行又問喜曰我欲進兵彭沛於卿意如何喜對曰臣實才非智者安敢預兆未然竊以淮左新平邊民未乂周氏始吞齊國難與爭鋒豈以弊卒疲兵復加深入且棄舟楫之工踐車騎之地去長就短非吳人所



便臣愚以爲不若安民保境寢兵復約然後廣募英奇  
順時而動斯久長之術也高宗不從後吳明徹陷周高  
宗謂喜曰卿之所言驗於今矣十二年加侍中十三年  
授散騎常侍丹陽尹遷吏部尚書常侍如故及高宗崩  
叔陵構逆勅中庶子陸瓊宣旨令南北諸軍皆取喜處  
分賊平又加侍中增封并前九百戶至德元年授信威  
將軍永嘉內史加秩中二千石初高宗委政於喜喜亦  
勤心納忠多所匡益數有諫諍事並見從由是十餘年  
間江東狹小遂稱全盛唯畧地淮北不納喜謀而吳明  
徹竟敗高宗深悔之謂袁憲曰不用毛喜計遂令至此  
朕之過也喜旣益親乃言無回避而皇太子好酒德每  
共幸人爲長夜之宴喜嘗爲言高宗以誠太子太子陰  
患之至是稍見踈遠初後主爲始興王所傷及瘡愈而  
自慶置酒於後殿引江總以下展樂賦詩醉而命喜于  
時山陵初畢未及踰年喜見之不懌欲諫而後主已醉  
喜升階佯爲心疾仆于階下移出省中後主醒乃疑之  
謂江總曰我悔召毛喜知其無疾但欲阻我懽宴非我  
所爲故姦詐耳乃與司馬申謀曰此人負氣吾欲將乞  
鄱陽兄弟聽其報讐可乎對曰終不爲官用願如聖旨  
傳緯爭之曰不然若許報讐欲置先皇何地後主曰當



乞一小郡勿令見人事耳乃以喜爲未嘉內史喜至郡不受俸秩政弘清靜民吏便之遇豐州刺史章六寶舉兵反郡與豐州相接而素無備禦喜乃脩治城隍嚴飾哭械又遣所部松陽令周磻領千兵援建安賊平授南安內史禎明元年徵爲光祿大夫領左驍騎將軍喜在郡有惠政乃徵入朝道路追送者數百里其年道病卒時年七十二有集十卷子處冲嗣官至儀同從事中郎中書侍郎

蔡徵字希祥侍中中撫軍將軍景歷子也幼聰敏精識彊記年六歲詣梁吏部尚書河南褚翔翔字仲舉嗟其穎悟七歲丁母憂居喪如成人禮繼母劉氏性悍忌視之不以道徵供持益謹初無怨色徵本名覽景歷以爲有王祥之性更名徵字希祥梁承聖初高宗爲南徐州刺史召補迎主簿尋授太學博士天嘉初遷始興王府法曹行參軍歷外兵參軍尚書主客郎所居以幹理稱太建初遷太子少傅丞新安王主簿通直散騎侍郎晉安王功曹史太子中舍人兼東宮領直中舍人如故丁父憂去職服闋襲封新豐縣侯授戎昭將軍鎮右新安王諮議參軍至德二年遷廷尉卿尋爲吏部郎遷太子中庶子中書舍人掌詔誥尋授左民尚書與僕射江總



知撰五禮事尋加寧遠將軍後主器其材幹任寄日重  
遷吏部尚書安右將軍每十日一往東宮於太子前論  
述古今得喪及當時政務又勅以廷尉寺獄事無大小  
取徵議決俄有勅遣徵收募兵士自爲部曲徵善撫卹  
得物情旬月之間衆近一萬徵位望旣重兼聲勢熏灼  
物議咸忌憚之尋徙爲中書令將軍如故中令清簡無  
事或云徵有怨言事聞後主後主大怒收奪人馬將誅  
之有固諫者獲免禎明三年隋軍濟江後主以徵有幹  
用權知中領軍日夜勤苦備盡心力後主嘉焉謂曰事  
寧有以相報及決戰於鍾山南崗勅徵守宮城西北大  
營尋令督衆軍戰事城陷隨例入關徵美容儀有口辯  
多所詳究至於士流官宦皇家戚屬及當朝制度憲章  
儀軌戶口風俗山川土地問無不對然性頗便佞進取  
不能以退素自業初拜吏部尚書啓後主借鼓吹後主  
謂所司曰鼓吹軍樂有功乃授蔡徵不自量揆紊我朝  
章然其父景歷旣有締構之功宜且如所啓拜訖卽追  
還徵不脩廉隅皆此類也隋文帝聞其敏贍召見顧問  
言輒會旨然累年不調久之除太常丞歷尚書民部儀  
曹郎轉給事卒時年六十七子翼治尚書官至司徒屬  
德教學士入隋爲東宮學士



史臣曰宗元饒夙夜匪懈濟務益時司馬申清恪在朝  
攻苦立行加之以忠節美矣毛喜深達事機匡贊時主  
蔡徵聰敏才瞻而擅權自躋惜哉

陳書卷二十九終

陳書卷三十

列傳第二十四

唐散騎常侍姚思廉撰

蕭濟

陸瓊子從典

顧野王

傅縡章華

蕭濟字孝康東海蘭陵人也少好學博通經史諮梁武

康熙二十五年重修

東書卷三十

列傳

一



帝左氏疑義三十餘條尚書僕射范陽張纘大常卿南陽劉之遴竝與濟討論縉等莫能抗對解褐梁秘書郎遷太子舍人預平侯景之功封松陽縣侯邑五百戶及高祖作鎮徐方以濟爲明威將軍征北長史承聖二年徵爲中書侍郎轉通直散騎常侍世祖爲會稽太守又以濟爲宣毅府長史遷司徒左長史世祖卽位授侍中尋遷太府卿丁所生毋憂不拜濟毗佐二主恩遇甚篤賞賜加於凡等歷守蘭陵陽羨臨津臨安等郡所在皆著聲績太建初入爲五兵尚書與左僕射徐陵特進周弘正度支尚書王瑒散騎常侍袁憲俱侍東宮復爲司

從長史尋授度支尚書領羽林監遷國子祭酒領羽林如故加金紫光祿大夫兼安德宮衛尉尋遷仁威將軍揚州長史高宗嘗勅取揚州曹事躬自省覽見濟條理詳悉文無滯害乃顧謂左右曰我本期蕭長史長於經傳不言精練繁劇乃至於此遷祠部尚書加給事中復爲金紫光祿大夫未拜而卒時年六十六詔贈本官官給喪事

陸瓊字伯玉吳郡吳人也祖完梁琅邪彭城二郡丞父雲公梁給事黃門侍郎掌著作瓊幼聰惠有思理六歲爲五言詩頗有詞采大同末雲公受梁武帝詔校定基



品到漑朱异以下竝集瓊時年八歲於客前覆局由是  
京師號曰神童异言之武帝有勅召見瓊風神警亮進  
退詳審帝甚異之十一丁父憂毀瘠有至性從祖襄歎  
曰此兒必荷門基所謂一不爲少及侯景作逆携母避  
地于縣之西鄉勤苦讀書晝夜無怠遂博學善屬文永  
定中州舉秀才天嘉元年爲寧遠始興王府法曹行參  
軍尋以本官兼尚書外兵郎以文學轉兼殿中郎滿歲  
爲真瓊素有令名深爲世祖所賞及討周迪陳寶應等  
都官符及諸大手筆竝中勅付瓊遷新安王文學掌東  
宮管記及高宗爲司徒妙簡僚佐吏部尚書徐陵薦瓊

於高宗曰新安王文學陸瓊見識優敏文史足用進居  
郎署歲月過淹左西掾缺允膺茲選階次小踰其屈滯  
已積乃除司徒左西掾尋兼通直散騎常侍聘齊大建  
元年重以本官掌東宮管記除太子庶子兼通事舍人  
轉中書侍郎太子家令長沙王爲江州刺史不循法度  
高宗以王年少授瓊長史行江州府國事帶尋陽太守  
瓊以母老不欲遠出太子亦固請留之遂不行累遷給  
事黃門侍郎領羽林監轉太子中庶子領步兵校尉又  
領大著作撰國史後主卽位直中書省掌詔誥俄授散  
騎常侍兼度支尚書領揚州大中正至德元年除度支



尚書參掌詔誥并判廷尉建康二獄事初瓊父雲公奉  
梁武帝勅撰嘉瑞記瓊述其旨而續焉自永定訖于至  
德勒成一家之言遷吏部尚書著作如故瓊詳練諧諛  
雅鑒人倫先是吏部尚書宗元饒卒右僕射袁憲舉瓊  
高宗未之用也至是居之號爲稱職後主甚委任焉瓊  
性謙儉不自封植雖位望日隆而執志愈下園池室宇  
無所改作車馬衣服不尚鮮華四時祿俸皆散之宗族  
家無餘財暮年深懷止足思避權要恒謝病不視事俄  
丁母憂去職初瓊之侍東宮也毋隨在官舍後主賞賜  
優厚及喪柩還鄉詔加賻贈并遣謁者黃長貴持冊奠  
祭後主又自製誌銘朝野榮之瓊哀慕過毀以至德四  
年卒時年五十詔贈領軍將軍官給喪事有集二十卷  
行於世長子從宜仕至武昌王文學第三子從典字由  
儀幼而聰敏八歲讀沈約集見回文研銘從典援筆擬  
之便有佳致年十三作柳賦其詞甚美瓊時爲東宮管  
記宮僚竝一時俊偉瓊示以此賦咸奇其異才從父瑜  
持所賞愛及瑜將終家中墳籍皆付從典從典乃集瑜  
文爲十卷仍製集序其文甚工從典篤好學業博涉羣  
書於班史尤所屬意年十五本州舉秀才解褐著作佐  
郎轉太子舍人時後主賜僕射江總并其父瓊詩總命



從典爲謝啓俄頃便就文華理暢總甚異焉尋授信義  
王文學轉太子洗馬又遷司徒左西掾兼東宮學士丁  
父憂去職尋起爲德教學士固辭不就後主勅留一員  
以待從典俄屬金陵淪沒隨例遷關右仕隋爲給事郎  
兼東宮學士又除著作佐郎右僕射楊素奏從典續司  
馬遷史記迄于隋其書未就值隋末喪亂寓居南陽郡  
以疾卒時年五十七

顧野王字希馮吳郡吳人也祖子喬梁東中郎武陵王  
府參軍事父烜信威臨賀王記室兼本郡五官掾以儒  
術知名野王幼好學七歲讀五經畧知大旨九歲能屬

文嘗製日賦領軍朱异見而奇之年十二隨父之建安  
撰建安地記二篇長而遍觀經史精記嘿識天文地理  
著龜占候蟲篆奇字無所不通梁大同四年除太學博  
士遷中領軍臨賀王府記室參軍宣城王爲揚州刺史  
野王及琅邪王褒竝爲賓客王甚愛其才野王又善丹  
青王於東府起齋乃令野王畫古賢命王褒書贊時人  
稱爲二絕及侯景之亂野王丁父憂歸本郡乃召募鄉  
黨數百人隨義軍援京邑野王體素清羸裁長六尺又  
居喪過毀殆不勝衣及杖戈被甲陳君臣之義逾順之  
理抗辭作色見者莫不壯之京城陷野王逃會稽尋往



東陽與劉歸義合軍據城拒賊侯景平太尉王僧辯深  
嘉之使監海鹽縣高祖作宰爲金威將軍安東臨川王  
府記室參軍尋轉府諮議參軍天嘉元年勅補撰史學  
士尋加招遠將軍光大元年除鎮東鄱陽王諮議參軍  
太建二年遷國子博士後主在東宮野王兼東宮管記  
本官如故六年除太子率更令尋領大著作掌國史知  
梁史事兼東宮通事舍人時宮僚有濟陽江總吳國陸  
瓊北地傅縡吳興姚察竝以才學顯著論者推重焉遷  
黃門侍郎光祿卿知五禮事餘官竝如故十三年卒時  
年六十三詔贈秘書監至德二年又贈右衛將軍野王

少以篤學至性知名在物無過辭失色觀其容貌似不  
能言及其勵精力行皆人所莫及第三弟充國早卒野  
王撫養孤幼恩義甚厚其所撰著玉篇三十卷輿地志  
三十卷符瑞圖十卷顧氏譜傳十卷分野樞要一卷續  
洞冥紀一卷玄象表一卷竝行於世又撰通史要畧一  
百卷國史紀傳二百卷未就而卒有文集二十卷  
傅縡字宜事北地靈州人也父彝梁臨沂令縡幼聰敏  
七歲誦古詩賦至十餘萬言長好學能屬文梁太清末  
攜母南奔避難俄丁母憂在兵亂之中居喪盡禮哀毀  
骨立士友以此稱之後依湘州刺史蕭循循頗好士廣



集墳籍緯肆志尋閱因博通羣書王琳聞其名引爲府  
記室琳敗隨琳將孫瑒還都時世祖使顏晃賜瑒雜物  
瑒託緯啓謝詞理優洽文無加點晃還言之世祖召爲  
撰史學士除司空府記室參軍遷驃騎安成王中記室  
撰史如故緯篤信佛教從興皇寺惠朗法師受三論盡  
通其學時有大心髡法師著無諍論以詆之緯乃爲明  
道論用釋其難其畧曰無諍論言比有弘三論者雷同  
訶詆恣言罪狀歷毀諸師非斥衆學論中道而執偏心  
語忘懷而競獨勝方學數論更爲讐敵讐敵旣構諍鬪  
大生以此之心而成罪業罪業不止豈不重增生死大

苦聚集答曰三論之興爲日久矣龍樹創其源除內學  
之偏見提婆揚其旨蕩外道之邪執欲使大化流而不  
擁玄風闡而無墜其言曠其意遠其道博其流深斯固  
龍象之騰驤鯤鵬之搏運寒乘決羽豈能缺望其間哉  
頃代澆薄時無曠士苟習小學以化蒙心漸染成俗遂  
迷正路唯競穿鑿各肆營造枝葉徒繁本源日翳一師  
解釋復異一師更改舊宗各立新意同學之中取寤復  
別如是展轉添糅倍多總而用之心無的准擇而行之  
何者爲正豈不渾沌傷竅嘉樹弊牙雖復人說非馬家  
握靈蛇以無當之卮同畫地之餅矣其於失道不亦宜



乎攝山之學則不如是守一遵本無改作之過約文申  
意杜臆斷之情言無預說理非宿構觀緣余乃應見敵  
然後動縱橫絡繹忽恍杳冥或彌綸而不窮或消散而  
無所煥乎有文章蹤朕不可得深乎不可量卽事而非  
遠凡相酬對隨理詳覈有何嫉詐于犯諸師且諸師所  
說爲是可毀爲不可毀若可毀者毀故爲衰若不可毀  
毀自不及法師何獨蔽護不聽毀乎且教有大小備在  
聖誥大乘之文則指斥小道今弘大法寧得不言大乘  
之意耶斯則褒貶之事從弘放學與奪之辭依經議論  
何得見佛說而信順在我語而忤逆無諍平等心如是

耶且忿恚煩惱凡夫怕性失理之徒率皆有此豈可  
三脩未愜六師懷恨而蘊涅槃妙法永不宜揚但冀其  
忿憤之心旣極恬淡之寤自成耳人面不同其心亦異  
或有辭意相反或有心口相符豈得必謂他人說中道  
而心偏執已行無諍外不違而內平等讐敵鬪訟豈我  
事焉罪業聚集鬪諍者所畏耳無諍論言攝山大師誘  
進化導則不如此卽習行於無諍者也導悟之德旣往  
淳一之風已澆競勝之心阿毀之曲盛於茲矣吾願息  
諍以通道讓勝以忘德何必排拂異家生其恚怒者乎  
若以中道之心行於成實亦能不諍若以偏著之心說



於中論亦得有諍固知諍與不諍偏在一法答曰攝山  
大師實無諍矣但法師所賞未衷其節彼靜守幽谷寂  
余無爲凡有訕勉莫匪同志從容語嘿物無間然故其  
意雖深其言甚約今之敷暢地勢不然處王城之隅居  
聚落之內呼吸顧望之客屑吻縱橫之士奮鋒穎勵羽  
翼明日張膽被堅執銳騁異家術別解窺伺間隙邀冀  
長短與相酬對撓其輕重豈得默默無言唯唯應命必  
須倚撫同異發擿玼瑕忘身而弘道忤俗而通教以此  
爲病益知未達若令大師當此之地亦何必默已而爲  
法師所貴耶法師又言吾願息諍以通道讓勝以忘德  
道德之事不止在諍與不諍讓與不讓也此語直是人  
間所重法師慕而言之竟未知勝若爲可讓也若他人  
道高則自勝不勞讓矣他人道劣則雖讓而無益矣欲  
讓之辭將非虛設中道之心無處不可成實三論何事  
致乖但須息守株之解除膠柱之意是事皆中也來旨  
言諍與不諍偏在一法何爲獨衷無諍耶詎非矛盾無  
諍論言邪正得失勝負是非必生於心矣非謂所說之  
法而有定相論勝劣也若異論是非以偏著爲失言無  
是無非消彼得失以此論爲勝妙者他論所不及此亦  
爲失也何者凡心所破豈無心於能破則勝負之心不



忘寧不存勝者乎斯則矜我爲得棄他之失卽有取舍  
大生是非便是增諍答曰言爲心使心受言詮和合根  
塵鼓動風氣故成語也事必由心實如來說至於心造  
僞以使口口行詐以應心外和而內險言隨而意逆求  
利養引聲名入道之人在家之士斯輩非一聖人所以  
曲陳教誡深致防杜說見在之殃咎敘將來之患害此  
文明著甚於日月猶有忘愛軀冒峻制蹈湯炭甘麤粉  
必行而不顧也豈能悅無諍之作而回首革音耶若弘  
道之人宣化之士心知勝也口言勝也心知劣也口言  
劣也亦無所苞藏亦無所忌憚但直心而行之耳他道  
雖劣聖人之教也已德雖優亦聖人之教也我勝則聖  
人勝他劣則聖人劣聖人之優劣蓋根緣所宜余於彼  
於此何所厚薄哉雖復終日按劔極夜擊柝瞋目以爭  
得失作氣以求勝負在誰處乎有心之與無心徒欲分  
別虛空耳何意不許我論說而使我謙退此謂鷦鷯已  
翔於寥廓而虞者猶窺藪澤而求之嗟乎丈夫當弘斯  
道矣無諍論言無諍之道通於內外子所言須諍者此  
用末而救本失本而營末者也今爲子言之何則若依  
外典尋書契之前至淳之世朴質其心行不言之教當  
于此時民至老死不相往來而各得其所復有何諍乎



固知本來不諍是物之真矣。答曰：諍與無諍不可偏執。本之與末又安可知？由來不諍，寧知非末？於今而諍，何驗非本？夫居後而望前，則爲前；居前而望後，則爲後。而前後之事，猶如彼此。彼呼此爲彼，此呼彼爲彼。彼此之名的居誰處？以此言之，萬事可知矣。本末前後是非善惡，可恒守邪？何得自信聰明廢他耳目？夫水泡生滅，火輪旋轉，入牢穽受羈，繼生憂畏，起煩惱其失何哉？不與道相應而起諸見，故也。相應者則不然，無爲也，無不爲也。善惡不能偕而未曾離，善惡生死不能至亦終然在。生死故得永離而任放焉。是以聖人念繞桎之不脫，慙黏膠之難離，故殷勤教示，備諸便巧，希向之徒涉求有類。雖鱗角難成象形，易失寧得不髣髴？遐路勉勵，短晨且當念己身之善惡，莫揣他物而欲分別而言我聰明。我知見我計校我思惟，以此而言亦爲踈矣。他人者實難測，或可是凡夫真，亦可是聖人。俯同時俗所宜見，果報所應覩，安得肆宵衿盡情性而生譏誚乎？正應虛已而遊乎世，俛仰於電露之間耳。明月在天，衆水咸見。清風在林，羣籟畢響。吾豈逾物哉？不入鮑魚，不甘腐鼠。吾豈同物哉？誰能知我共行斯路，浩浩堂堂乎？豈復見有諍爲非無諍爲是？此則諍者自諍，無諍者自無諍。吾



俱取而用之寧勞法師費功夫點筆紙但申於無諍第  
子疲辱古消暑漏唯對於明道戲論於糟粕哉必欲且  
考真偽覈觀得失無過依賢聖之言檢行藏之理始終  
研究表裏綜覈使浮辭無所用詐道自然消請待後庭  
以觀其妙矣尋以本官兼通直散騎侍郎使齊還除散  
騎侍郎鎮南始興王諮議參軍兼東宮管記歷太子庶  
子僕兼管記如故後主卽位遷秘書監右衛將軍兼中  
書通事舍人掌詔誥繹爲文典麗性又敏速雖軍國大  
事下筆輒成未嘗起草沈思者亦無以加焉甚爲後主  
所重然性不彊不持檢操負才使氣陵侮人物朝士多  
銜之會施文慶沈客卿以便佞親幸專制衡軸而繹益  
踈文慶等因共譖繹受高麗使金後主收繹下獄繹素  
剛因憤恚乃於獄中上書曰夫君人者恭事上帝于愛  
下民省嗜欲遠諂佞未明求衣日旰忘食是以澤被區  
宇慶流子孫陛下頃來酒色過度不虔郊廟之神專媚  
淫昏之鬼小人在側宦豎弄權惡忠直若仇讐視生民  
如草芥後宮曳綺繡廐馬餘菽粟百姓流離僵尸蔽野  
貨賂公行帑藏損耗神怒民怨衆叛親離恐東南王氣  
自斯而盡書奏後王大怒頃之意稍解遣使謂繹曰我  
欲赦卿卿能改過不繹對曰臣心如面臣面可改則臣



心可改後主於是益怒令宦者李善慶窮治其事遂賜  
死獄中時年五十五有集十卷行於世時有吳興章華  
字仲宗家世農夫至華獨好學與士君子遊處頗覽經  
史善屬文侯景之亂乃遊嶺南居羅浮山寺專精習業  
歐陽頴爲廣州刺史署爲南海太守及歐陽紇敗乃還  
京師太建中高宗使吏部侍郎蕭引喻廣州刺史馬靖  
令入子爲質引奏華與俱行使還而高祖崩後主卽位  
朝臣以華素無伐閱競排抵之乃除大市令旣雅非所  
好乃辭以疾鬱鬱不得志禎明初上書極諫其大畧曰  
昔高祖南平百越北誅逆虜世祖東定吳會西破王琳

高宗克復淮南辟地千里三祖之功亦至勤矣陛下卽  
位于今五年不思先帝之艱難不知天命之可畏溺於  
嬖寵惑於酒色祀七廟而不出拜妃嬪而臨軒老臣宿  
將棄之草莽諂佞讒邪昇之朝廷今壇場日蹙南軍壓  
境陛下如不改弦易張臣見麋鹿復遊於姑蘇臺矣書  
奏後主大怒卽日命斬之

史臣曰蕭濟陸瓊俱以才學顯著顧野王博極羣典傳  
梓聰警特達竝一代之英靈矣然絳不能循道進退遂  
寘極網悲夫



書卷三十終

書卷三十一

傳第二十五

唐散騎常侍姚思廉撰

蕭摩訶 子世廉

任忠

樊毅 弟猛

魯廣達

蕭摩訶字元胤蘭陵人也祖靚梁右將軍父諒梁始興

康記十五年重修

康書卷三十一

傳

一



郡丞摩訶隨父之郡年數歲而父卒其姑夫蔡路養時在南康乃收養之稍長果毅有勇力侯景之亂高祖赴援京師路養起兵拒高祖摩訶時年十三單騎出戰軍中莫有當者及路養敗摩訶歸于侯安都安郡遇之甚厚自此常隸安都征討及任約徐嗣徽引齊兵爲寇高祖遣安都北拒齊軍於鍾山龍尾及北郊壇安都謂摩訶曰卿驍勇有名千聞不如一見摩訶對曰今日令公見矣及戰安都墜馬被圍摩訶獨騎大呼直衝齊軍齊軍披靡因稍解去安都乃免天嘉初除本縣令以平留異歐陽紇之功累遷巴山太守太建五年衆軍北伐摩訶隨都督吳明徹濟江攻秦郡時齊遣大將尉破胡等率衆十萬來援其前隊有蒼頭犀角大力之號皆身長八尺膂力絕倫其鎗甚銳又有西域胡妙於弓矢弦無虛發衆軍尤憚之及將戰明徹謂摩訶曰若殪此胡則彼軍奪氣君有關張之名可斬顏良矣摩訶曰願示其形狀當爲公取之明徹乃召降人有識胡者云胡著絳衣樺皮裝弓兩端骨弭明徹遣人覘伺知胡在陣乃自酌酒以飲摩訶摩訶飲訖馳馬衝齊軍胡挺身出陣前十餘步彀弓未發摩訶遙擲銃鏡正中其額應手而仆齊軍大力十餘人出戰摩訶又斬之於是齊軍退走以



功授明毅將軍員外散騎常侍封廉平縣伯邑五百戶  
尋進爵爲侯轉大僕卿餘如故七年又隨明徹進圍宿  
預擊走齊將王康德以功除晉熙太守九年明徹進軍  
呂梁與齊人大戰摩訶率七騎先入手奪齊軍大旗齊  
衆大潰以功授持節武毅將軍譙州刺史及周武帝滅  
齊遣其將宇文忻率衆爭呂梁戰於龍晦時忻有精騎  
數千摩訶領十二騎深入周軍縱橫奮擊斬馘甚衆及  
周遣大將軍王軌來赴結長圍連鑊於呂梁下流斷大  
軍還路摩訶謂明徹曰聞王軌始鑊下流其兩頭築城  
今尚未立公若見遣擊之彼必不敢相拒水路未斷賊  
勢不堅彼城若立則吾屬且爲虜矣明徹乃奮髯曰寧  
旗陷陣將軍事也長筭遠畧老夫事也摩訶失色而退  
一旬之間周兵益至摩訶又請於明徹曰今求戰不得  
進退無路若潛軍突圍未足爲恥願公引步卒乘馬輦  
徐行摩訶領鐵騎數千驅馳前後必當使公安達京邑  
明徹曰弟之此計乃良圖也然老夫受朕專征不能戰  
勝攻取今被圍逼感慙寘無地且步軍旣多吾爲總督  
必須身居其後相率兼行弟馬軍宜須在前不可遲緩  
摩訶因率馬軍夜發先是周軍長圍旣合又於要路下  
伏數重摩訶選精騎八十率先衝突自後衆騎繼焉比



且達淮南高宗詔徵還授右衛將軍十一年周兵寇壽陽摩訶與樊毅等衆軍赴援無功而還十四年高宗崩始興王叔陵於殿內手刃後主傷而不死叔陵奔東府城時衆心猶預莫有討賊者東宮舍人司馬申啓後主馳召摩訶入見受勅乃率馬步數百先趣東府城西門屯軍叔陵惶遽自城南門而出摩訶勒兵追斬之以功授散騎常侍車騎大將軍封綏遠郡公邑三千戶叔陵素所蓄聚金帛累巨萬後主悉以賜之尋改授侍中驃騎大將軍加左光祿大夫舊制三公黃閣聽事置鴟尾後主特賜摩訶開黃閣門施行馬廳事寢堂並置鴟尾仍以其女爲皇太子妃會隋總管賀若弼鎮廣陵窺餽江左後主委摩訶備禦之任授南徐州刺史餘並如故禎明三年正月元會徵摩訶還朝賀若弼乘虛濟江襲京口摩訶請兵逆戰後主不許及若弼進軍鍾山摩訶又請曰賀若弼懸軍深入聲援猶遠且其壘漸未堅人情惶懼出兵掩襲必大克之後主又不許及隋軍大至將出戰後主謂摩訶曰公可爲我一決摩訶曰從來行陣爲國爲身今日之事兼爲妻子後主多出金帛頒賞諸軍令中領軍魯廣達陳兵白土崗居衆軍之南偏鎮東大將軍任忠次之護軍將軍樊毅都官尚書孔範次



之摩訶軍最居北衆軍南北亘二十里首尾進退各不相知賀若弼初謂未戰將輕騎登山觀望形勢及見衆軍因馳下置陣廣達首率所部進薄弼軍屢却俄而復振更分軍趣北突諸將孔範出戰兵交而走諸將支離陣猶未合騎卒潰散駐之弗止摩訶無所用力焉爲隋軍所執及京城陷賀若弼置後主於德教殿令兵衛守摩訶請弼曰今爲囚虜命在斯須願得一見舊主死無所恨弼哀而許之摩訶入見後主俯伏號泣仍於舊厨取食而進之辭訣而出守衛者皆不能仰視其年入隋授開府儀同三司尋從漢王諒詣并州同諒作逆伏誅時年七十三摩訶訥於語言恂恂長者至於臨戎對寇志氣奮發所向無前年未弱冠隨侯安都在京口性好射獵無日不畋遊及安都東征西伐戰勝攻取摩訶功寔居多子世廉少警俊敢勇有父風性至孝及摩訶凶終服闋後追慕彌切其父時賓故脫有所言及世廉對之哀慟不自勝言者爲之歔歔終身不執刀斧時人嘉焉摩訶有騎士陳智深者勇力過人以平叔陵之功爲巴陵內史摩訶之戮也其妻子先已籍沒智深收摩訶屍手自殯斂哀感行路君子義之潁川陳禹亦隨摩訶征討聰敏有識量涉獵經史解風角兵書頗能屬文便



騎射宮至王府諮議

任忠字奉誠小名蠻奴汝陰人也少孤微不爲鄉黨所齒及長譎詭多計畧膂力過人尤善騎射州里少年皆附之梁鄱陽王蕭範爲合州刺史聞其名引置左右侯景之亂忠率鄉黨數百人隨晉熙太守梅伯龍討景將王貴顯於壽春每戰却敵會土人胡通聚衆寇抄範命忠與王帥梅思立并軍討平之仍隨範世子嗣率衆入援會京城陷旋戍晉熙侯景平授蕩寇將軍王琳立蕭莊署忠爲巴陵太守琳敗還朝遷明毅將軍安湘太守仍隨侯瑱進討巴湘累遷豫寧太守衡陽內史華皎之

舉兵也忠預其謀及皎平高公以忠先有密啓於朝廷釋而不問太建初隨章昭達討歐陽訖於廣州以功授直閣將軍遷武毅將軍廬陵內史秩滿入爲右軍將軍五年衆軍北伐忠將兵出西道擊走齊歷陽王高景安於大峴逐北至東關仍克其東西二城進軍蘄譙竝拔之徑襲合肥入其郛進克霍州以功授員外散騎常侍封安復縣侯邑五百戶呂梁之喪師也忠全軍而還尋詔忠都督壽陽新蔡霍州緣淮衆軍進號寧遠將軍霍州刺史入爲左衛將軍十一年加北討前軍寧遠號平北將軍率衆步騎趣秦郡十二年遷使持節散騎常侍



都督南豫州諸軍事平南將軍南豫州刺史增邑并前  
一千五百戶仍率步騎趣歷陽周遣王延貴率衆爲援  
忠大破之生擒延貴後主嗣位進號鎮南將軍給鼓吹  
一部入爲領軍將軍加侍中改封梁信都郡公邑三千  
戶出爲吳興內史加秩中二千石及隋兵濟江忠自吳  
興入赴屯軍朱雀門後主召蕭摩訶以下於內殿定議  
忠執議曰兵家稱客主異勢客貴速戰主貴持重宜且  
益兵堅守宮城遣水軍分向南豫州及京口道斷寇糧  
運待春水長上江周羅暉等衆軍必公流赴援此良計  
矣衆議不同因遂出戰及敗忠馳入臺見後主言敗狀

啓云陛下唯當具舟楫就上流衆軍臣以死奉衛後主  
信之勅忠出部分忠辭云臣處分訖卽當奉迎後主令  
宮人裝束以待忠又望不至隋將韓擒虎自新林進軍  
忠乃率數騎往石子崗降之仍引擒虎軍共入南掖門  
臺城陷其年入長安隋授開府儀同三司卒時年七十  
七子幼武官至儀同三司時有沈客卿者吳興武康人  
性便佞忍酷爲中書舍人每立異端唯以刻削百姓爲  
事由是自進有施文慶者吳興烏程人起自微賤有吏  
用後主拔爲主書遷中書舍人俄擢爲湘州刺史未及  
之官會隋軍來伐四方州鎮相繼以聞文慶客卿俱掌



機密外有表啓皆由其呈奏文慶心悅湘州重鎮冀欲  
早行遂與客卿共爲表裏抑而不言後主弗之知遂以  
無備至乎敗國二人之罪也隋軍旣入竝戮之前闕  
樊毅字智烈南陽湖陽人也祖方興梁散騎常侍仁威  
將軍司州刺史魚復縣侯父支熾梁散騎常侍信武將  
軍益州刺史新蔡縣侯毅累葉將門少習武善射侯景  
之亂毅率部曲隨叔父文皎援臺文皎於青溪戰歿毅  
將宗族子弟赴江陵仍隸王僧辯討河東王蕭譽以功  
除假節威戎將軍右中郎將代兄俊爲梁興太守領三  
州遊軍隨宜豐侯蕭循討陸納於湘州軍次巴陵營頓  
未立納潛軍夜至薄營大誅營中將士皆驚擾毅獨與  
左右數十人當營門力戰斬十餘級擊鼓申命衆乃定  
焉以功授持節通直散騎常侍貞威將軍封夷道縣伯  
食邑三百戶尋除天門太守進爵爲侯增邑并前一千  
戶及西魏圍江陵毅率兵赴援江陵陷爲岳陽王所執  
久之遁歸高祖受禪毅與弟猛舉兵應王琳琳敗奔齊  
太尉侯瑱遣使招毅毅率子弟部曲還朝天嘉二年授  
通直散騎常侍仍隨侯瑱進討巴湘累遷武州刺史太  
建初轉豐州刺史封高昌縣侯邑一千戶入爲左衛將  
軍五年衆軍北伐毅率衆攻廣陵楚子城拔之擊走齊



軍於賴口齊援滄陵又破之七年進克潼州下邳高柵  
等六城及呂梁喪師詔以毅爲大都督進號平北將軍  
率衆渡淮對清口築城與周人相抗霖雨城壞毅全軍  
自拔尋遷中領軍十一年周將梁士彥將兵圍壽陽詔  
以毅爲都督北討前軍事率水軍入焦湖尋授鎮西將  
軍都督荆郢巴武四州水陸諸軍事十二年進督沔漢  
諸軍事以公事免十三年徵授中護軍尋遷護軍將軍  
荆州刺史後主卽位進號征西將軍改封逍遙郡公邑  
三千戶餘竝如故入爲侍中護軍將軍及隋兵濟江毅  
謂僕射袁憲曰京口采石俱是要所各須銳卒數千金  
越二百都下江中上下防捍如其不然大事去矣諸將  
咸從其議會施文慶等廢隋兵消息毅計不行京城陷  
隨例入關頃之卒

猛字智武毅之弟也幼倣儻有幹畧旣壯便弓馬膽氣  
過人青溪之戰猛自旦訖暮與虜短兵接殺傷甚衆臺  
城陷隨兄毅西上京累戰功爲威戎將軍梁安南侯蕭  
方矩爲湘州刺史以猛爲司馬會武陵王蕭紀舉兵自  
漢江東下方矩遣猛率湘郢之卒隨都督陸法和進軍  
以拒之時紀已下樓船戰艦據巴江爭峽口相持久之  
不能決法和揣紀師老卒惰因令猛率驍勇三千輕舸



百餘乘衝流直上出其不意鼓譟薄之紀衆倉卒驚駭  
不及整列皆棄艦登岸赴水死者以千數時紀心背數  
百人猶在左右猛將部曲三千餘人蒙楯橫戈直登紀  
舟瞋目大呼紀侍衛皆披靡相枕藉不敢動猛手擒紀  
父子三人斬於船中盡收其船艦器械以功授游騎將  
軍封安山縣伯邑一千戶仍進軍撫定梁益蜀境悉平  
軍還遷持節散騎常侍輕車將軍司州刺史進爵爲侯  
增邑并前二千戶永定元年周文育等敗於沌口爲王  
琳所獲琳乘勝將畧南中諸郡遣猛與李孝欽等將兵  
攻豫章進逼周迪軍敗爲迪所執尋遁歸王琳王琳敗

還朝天嘉二年授通直散騎常侍永陽太守遷安成王  
府司馬光大元年授壯武將軍廬陵內史太建初遷武  
毅將軍始興平南府長史領長沙內史尋隸章昭達西  
討江陵潛軍入峽焚周軍船艦以功封富川縣侯邑五  
百戶歷散騎常侍遷使持節都督荆信二州諸軍事宣  
遠將軍荊州刺史入爲左衛將軍後主卽位增邑并前  
一千戶餘竝如故至德四年授使持節都督南豫州諸  
軍事忠武將軍南豫州刺史隋將韓擒虎之濟江也猛  
在京師第六子巡攝行州事擒虎進軍攻陷之巡及家  
口竝見執時猛與左衛將軍蔣元遜領青龍八十艘爲



水軍於白下遊弈以禦隋六合兵後主知猛妻子在隋軍懼其有異志欲使任忠代之又重傷其意乃止禎明三年入于隋

魯廣達字遍覽吳州刺史悉達之弟也少慷慨志立功名虛心愛士賓客或自遠而至時江表將帥各領部曲動以千數而魯氏尤多釋褐梁邵陵王國右常侍遷平南當陽公府中兵參軍侯景之亂與兄悉達聚眾保新蔡梁元帝承制授假節壯武將軍晉州刺史王僧辯之討侯景也廣達出境候接資奉軍儲僧辯謂沈炯曰魯晉州亦是王師東道主人仍率眾隨僧辯景平加員外

散騎常侍餘如故高祖受禪授征遠將軍東海太守尋徙爲桂陽太守固辭不拜入爲員外散騎常侍除假節信武將軍北新蔡太守隨吳明徹討周迪於臨川每戰功居最仍代兄悉達爲吳州刺史封中宿縣侯邑五百戶光祿大夫元年授通直散騎常侍都督南豫州諸軍事南豫州刺史華皎稱兵上流詔司空淳于量率眾軍進討軍至夏口皎舟師逼盛莫敢進者廣達首率驍勇直衝賊軍戰艦旣交廣達憤怒大呼登艦樓獎勵士卒風急艦轉樓搖動廣達足跌墮水沈溺久之因救獲免皎平授持節智武將軍都督巴州諸軍事巴州刺史太



建初與儀同章昭達入峽口拓定安蜀等諸州鎮時周氏將圖江左大造舟艦於蜀并運糧青泥廣達與錢道戢等將兵掩襲縱火焚之以功增封并前二千戶仍還本鎮廣達爲政簡要推誠任下吏民便之及秩滿皆詣闕表請於是詔留二年五年衆軍北伐畧淮南舊地廣達與齊軍會於大峴大破之斬其敷城主張元範虜獲不可勝數進克北徐州乃授都督北徐州諸軍事徐州刺史尋加散騎常侍入爲右衛將軍八年出爲北兗州刺史遷晉州刺史十年授使持節都督合霍二州諸軍事進號仁威將軍合州刺史十一年周將梁士彥將兵

圍壽春詔遣中領軍樊毅左衛將軍任忠等分部趣陽平秦郡廣達率衆入淮爲掎角以擊之周軍攻陷豫霍二州南北兗晉等各自拔諸將竝無功盡失淮南之地廣達因免官以侯還第十二年與豫州刺史樊毅率衆北討克郭默城尋授使持節平西將軍都督郢州以上十州諸軍事率舟師四萬頓江夏周安州總管元景將兵寇江外廣達命偏師擊走之後王卽位入爲安左將軍尋授平南將軍南豫州刺史至德二年授安南將軍徵拜侍中又爲安左將軍改封綏越郡公封邑如前尋爲中領軍及賀若弼進軍鍾山廣達率衆於白土崗南



置陣與弼旗鼓相對廣達躬擐甲胄手執桴鼓率勵敢死冒刃而前隋軍退走廣達逐北至營殺傷甚衆如是者數四焉及弼攻敗諸將乘勝至宮城燒北掖門廣達猶督餘兵苦戰不息斬獲數十百人會日暮乃解甲面臺再拜慟哭謂衆曰我身不能救國負罪深矣士卒皆涕泣歔歔於是乃就執禎明三年依例入隋廣達愴本朝淪覆遘疾不治尋以憤慨卒時年五十九尚書令江總撫柩慟哭乃命筆題其棺頭爲詩曰黃泉雖抱恨白日自流名悲君感義死不作負恩生總又製廣達墓銘其畧曰災流淮海險失金湯時屯運極代革天亡爪牙

背義介胄無良獨標忠勇率禦有方誠貫皎日氣勵嚴霜懷恩感報撫事何忘初隋將韓擒虎之濟江也廣達長子世真在新蔡乃與其弟世雄及所部奔擒虎擒虎遣使致書招廣達廣達時屯兵京師乃自劾廷尉請罪後主謂之曰世真雖異路中大夫公國之重臣吾所恃賴豈得自同嫌疑之間乎加賜黃金卽日還營廣達有隊主楊孝辯時從廣達在軍中力戰陷陣其子亦隨孝辯揮刃殺隋兵十餘人力窮父子俱死

史臣曰蕭摩訶氣冠三軍當時良將雖無智畧亦一代匹夫之勇矣然口訥心勁恂恂李廣之徒歎任忠雖勇



決疆斷而心懷反覆誣給君上自贖其惡鄙矣至於魯  
廣達全忠守道殉義忘身蓋亦陳代之良臣也

陳書卷三十一終

陳書卷三十二

列傳第二十六

唐散騎常侍姚思廉撰

孝行

殷不害 弟不佞

謝貞

司馬勗

張昭



孔子曰夫聖人之德何以加於孝乎孝者百行之本夫  
倫之至極也凡在性靈孰不由此若乃奉生盡養送終  
盡哀或泣血三年絕漿七日思蓼莪之慕切追顧復之  
恩深或德感乾坤誠貫幽顯在於歷代蓋有人矣陳承  
梁室喪亂風漓化薄及迹隱閭閻無聞視聽今之採綴  
以備闕云

殷不害字長卿陳郡長平人也祖任齊豫章王行參軍  
父高明梁尚書中兵郎不害性至孝居父憂過禮由是  
少知名家世儉約居甚貧窶有第五人皆幼弱不害事  
老母養小弟勤劇無所不至士大夫以篤行稱之年十  
七仕梁廷尉平不害長於政事兼飾以儒術名法有輕  
重不便者輒上書言之多見納用大同五年遷鎮西府  
記室參軍尋以本官兼東宮通事舍人是時朝廷政事  
多委東宮不害與舍人庾肩吾直日奏事梁武帝嘗謂  
肩吾曰卿是文學之士吏事非卿所長何不使殷不害  
來邪其見知如此簡文又以不害善事親賜其母蔡氏  
錦裙襦氈席被褥單複畢備七年除東宮步兵校尉太  
清初遷平北府諮議參軍舍人如故侯景之亂不害從  
簡文入臺及臺城陷簡文在中書省景帶甲將兵入朝  
陛見過謁簡文景兵士皆羗胡雜種衝突左右甚不遜



侍衛者莫不驚恐辟易唯不害與中庶子徐攜侍側不  
動及簡文爲景所幽遣人請不害與居處景許之不害  
供侍益謹簡文夜夢吞一塊土意甚不悅以告不害不  
害曰昔晉文公出奔野人遺之塊卒反晉國陛下此夢  
事符是乎簡文曰若天有徵冀斯言不妄梁元帝立以  
不害爲中書郎兼廷尉卿因將家屬西上江陵之陷也  
不害先於別所督戰失母所在干時甚寒冰雪交下老  
弱凍死者填滿溝壑不害行哭道路遠近尋求無所不  
至遇見死人溝水中卽投身而下扶捧閱視舉體凍濕  
水漿不入口號泣不輟聲如是者七日始得母屍不害

憑屍而哭每舉音輒氣絕行路無不爲之流涕卽於江  
陵權殯與王裒庾信俱入長安自是蔬食布衣枯槁骨  
立見者莫不哀之太建七年自周還朝其年詔除司農  
卿尋遷光祿大夫八年加明威將軍晉陵太守在郡感  
疾詔以光祿大夫徵還養疾後主卽位加給事中初不  
害之還也周留其長子僧首因居關中禎明三年京城  
陷僧首來迎不害道病卒時年八十五

不佞字季卿不害弟也少立名節居父喪以至孝稱好  
讀書尤長吏術仕梁起家爲尚書中兵郎甚有能稱梁  
元帝承制授戎昭將軍武陵王諮議參軍承聖初遷武



康令時兵荒飢饉百姓流移不佞巡撫招集繼負而至者以千數會江陵陷而毋卒道路隔絕又不得奔赴四載之中晝夜號泣居處飲食常爲居喪之禮高祖受禪起爲戎昭將軍除婁令至是第四兄不齊始之江陵迎毋喪柩歸葬不佞居處之節如始聞問若此者又三年身自負土手植松栢每歲時伏臘必三日不食世祖卽位除尚書左民郎不就後爲始興王諮議參軍兼尚書右丞遷東宮通事舍人及世祖崩廢帝嗣位高宗爲太傅錄尚書輔政甚爲朝望所歸不佞素以名節自立又受委東宮乃與僕射到仲舉中書舍人劉師知尚書右

丞王暹等謀矯詔出高宗衆人猶豫未敢先發不佞乃馳詣相府面宣勅令相王還第及事發仲舉等皆伏誅高宗雅重不佞特赦之免其官而已高宗卽位以爲軍師始興王諮議參軍加招遠將軍尋除大匠卿未拜加員外散騎常侍又兼尚書右丞俄遷通直散騎常侍右丞如故太建五年卒時年五十六詔贈秘書監第二兄不疑次不占次不齊並早亡不佞最小事第二寡嫂張氏甚謹所得祿俸不入私室長子梵童官至尚書金部郎

謝貞字元正陳郡陽夏人晉太傅安九世孫也祖綏梁



著作佐郎太子舍人父蘭正員外郎兼散騎常侍貞幼  
聰敏有至性祖母阮氏先苦風眩每發便一二日不能  
飲食貞時年七歲祖母不食貞亦不食徃徃如是親族  
莫不奇之母王氏授貞論語孝經讀訖便誦八歲嘗爲  
春日閑居五言詩從舅尚書王筠奇其有佳致謂所親  
曰此兒方可大成至如風定花猶落乃追步惠連矣由  
是名輩知之年十三畧通五經大旨尤善左氏傳工草  
隸蟲篆十四丁父艱號頓於地絕而復蘇者數矣初父  
蘭居母阮氏憂不食泣血而卒家人賓客懼貞復然從  
父洽族兄嵩乃共往華嚴寺請長爪禪師爲貞說法仍  
謂貞曰孝子旣無兄弟極須自愛若憂毀滅性誰養母  
邪自後少進餽粥太清之亂親屬散亡貞於江陵陷沒  
高逃難番禺貞毋出家於宣明寺及高祖受禪嵩還鄉  
里供養貞毋將二十年太建五年貞乃還朝除智武府  
外兵參軍事俄遷尚書駕部郎中尋遷侍郎及始興王  
叔陵爲揚州刺史引祠部侍郎阮卓爲記室辟貞爲主  
簿貞不得已乃行尋遷府錄事參軍領丹陽丞貞度叔  
陵將有異志因與卓自踈於王每有宴遊輒辭以疾未  
嘗參預叔陵雅欽重之弗之罪也俄而高宗崩叔陵肆  
逆府僚多相連逮唯貞與卓獨不坐後主仍詔貞入掌



中宮管記遷南平王友加招遠將軍掌記室事府長史  
汝南周確新除都官尚書請貞爲讓表後主覽而奇之  
嘗因宴席問確曰卿表自製邪確對曰臣表謝貞所作  
後主因勅舍人施文慶曰謝貞在王處未有祿秩可賜  
米百石至德三年以母憂去職頃之勅起還府仍加招  
遠將軍掌記室貞累啓固辭勅報曰省啓具懷雖知哀  
亮在疚而官俟得才禮有權奪可便力疾還府也貞哀  
毀羸瘠終不能之官舍時尚書右丞徐祚尚書左丞沈  
客卿俱來候貞見其形體骨立祚等愴然歎息徐喻之  
曰弟年事已衰禮有恒制小宜引割自全貞因更感動  
氣絕良久二人涕泣不能自勝憫默而出祚謂客卿曰  
信哉孝門有孝子客卿曰謝公家傳至孝士大夫誰不  
仰止此恐不能起如何吏部尚書吳興姚察與貞友善  
及貞病篤察徃省之問以後事貞曰孤子豐禍所集將  
隨灰壤族子凱等粗自成立已有疏付之此固不足仰  
塵厚德卽日迷喘時不可移便爲永訣弱兒年甫六歲  
名靖字依仁情累所不能忘敢以爲託耳是夜卒勅賻  
米一百斛布三十匹後主問察曰謝貞有何親屬察因  
啓曰貞有一子年六歲卽有勅長給衣糧初貞之病亟  
也遺疏告族子凱曰吾少罹酷罰十四傾外蔭十六鍾



太清之禍流離絕國二十餘載號天踏地遂同有感得  
還侍奉守先人墳墓於吾之分足矣不悟朝廷採拾空  
薄累致清階縱其殞絕無所酬報今在憂棘晷漏將盡  
斂手而歸何所多念氣絕之後若直棄之草野依僧家  
屍施林法是吾所願正恐過爲獨異耳可用薄板周身  
載以露車覆以葦茨坎山而埋之又吾終尠兄弟無他  
子孫靖年幼少未閑人事但可三月施小牀設香水盞  
卿兄弟相厚之情卽除之無益之事勿爲也初貞在周  
嘗侍趙王讀王卽周武帝之愛弟也厚相禮遇上嘗聞  
左右說貞每獨處必晝夜涕泣因私使訪問知貞母年  
老遠在江南乃謂貞曰寡人若出居藩當遣侍讀還家  
供養後數年王果出因辭見面奏曰謝貞至孝而母老  
臣願放還帝奇王仁愛而遣之因隨聘使杜子暉還國  
所有集值兵亂多不存

司馬暘字文昇河內温人也高祖晉侍中光祿勳柔之  
以南頓王孫紹齊文獻王攸之後父子產梁尚書水部  
侍郎岳陽太守卽梁武帝之外兄也暘幼聰警有至性  
年十二丁內艱孺慕過禮水漿不入口殆經二旬每至  
號慟必致悶絕內外親戚皆懼其不勝喪父子產每曉  
喻之逼進饘粥然毀瘠骨立服闋以姻戚子弟預入周



訊梁武帝見嵩羸瘦歎息良久謂其父子產曰昨見羅  
兒面顏顛頽使人惻然便是不墜家風爲有子矣羅兒  
卽嵩小字也釋褐太學博士累遷正員郎丁父艱哀毀  
逾甚廬于墓側一日之內唯進薄麥粥一升墓在新林  
連接山阜舊多猛獸嵩結廬數載豺狼絕迹常有兩鳩  
棲宿廬所馴狎異常新林至今猶傳之承聖中除太子  
庶子江陵陪隨例入關而梁室屠戮太子瘞殞失所嵩  
以宮臣乃抗表周朝求還江陵改葬辭甚酸切周朝優  
詔答曰昔主父從戮孔車有長者之風彭越就誅樂布  
得陪臣之禮庶子鄉國已改猶懷送往之情始驗忠貞

方知臣道卽勅荆州以禮安厝太建八年自周還朝高  
宗特降殊禮賞錫有加除宜都王諮議參軍事徙安德  
宮長秋卿通直散騎常侍太中大夫司州大中正卒于  
官有集十卷子延義字希忠少沈敏好學江陵之陪隨  
父入關丁母憂喪過于禮及嵩還都延義乃躬負靈櫬  
晝伏宵行冒履冰霜手足皆皸疥及至都以中風冷遂  
致攣癈數年方愈稍遷鄱陽王錄事參軍沅陵王友司  
徒從事中郎

張昭字德明吳郡吳人也幼有孝性色養甚謹禮無違  
者父煖常患消渴嗜鮮魚昭乃身自結網捕魚以供朝



夕第乾字玄明聰敏博學亦有至性及父卒兄弟並不  
衣綿帛不食鹽醋日唯食一升麥屑粥而已每一感慟  
必致嘔血隣里聞其哭聲皆爲之涕泣父服未終母陸  
氏又亡兄弟遂六年哀毀形容骨立親友見者莫識焉  
家貧未得大葬遂布衣蔬食十有餘年杜門不出屏絕  
人事時衡陽王伯信臨郡舉乾孝廉固辭不就兄弟並  
因毀成疾昭失一眼乾亦中冷苦癖年並未五十終于  
家子胤俱絕

高宗世有太原王知玄者僑居于會稽剡縣居家以孝  
聞及丁父憂哀毀而卒高宗嘉之詔改其所居清苦里  
爲孝家里

史臣曰人倫之德莫大於孝是以報本反始盡性窮神  
孝乎惟孝不可不勗矣故記云塞乎天地盛哉



陳書卷三十三 列傳第二十七

陳書卷三十三

列傳第二十七

唐散騎常侍姚思廉撰

儒林

沈文阿

沈洙

戚袞

鄭灼

張崖

陸詡

沈德威

賀德基

康熙十五年重修

陳書卷三十三

列傳

一

一



全 緩

張 譏

顧 越

沈不害

王元規

蓋今儒者本因古之六學以教之典籍斯則先聖所以  
明天道正人倫致治之成法也秦始皇焚書坑儒六學  
自此缺矣漢武帝立五經博士置弟子員設科射策勸  
以官祿其傳業者甚衆焉自兩漢登賢咸資經術魏晉  
浮蕩儒教淪歇公卿士庶罕通經業矣宋齊之間國學

時後開置梁武帝開五館建國學總以五經教授經各  
置助教云武帝或紆鑾駕臨幸庠序釋奠先師躬親試  
胄申之醮語勞之束帛濟濟焉斯蓋一代之盛矣高祖  
創業開基承前代離亂衣冠殄盡寇賊未寧既日不暇  
給弗遑勸課世祖以降稍置學官雖博延生徒成業蓋  
寡今之採綴蓋亦梁之遺儒云

沈文阿字國衛吳興武康人也父峻以儒學聞於梁世  
授桂州刺史不行文阿性剛彊有膂力少習父業研精  
章句祖舅太史叔明舅王慧興竝通經術而文阿頗傳  
之又博採先儒異同自為義疏治三禮三傳察孝廉為



梁臨川王國侍郎累遷兼國子助教五經博士梁簡文在東宮引爲學士深相禮遇及撰長春義記多使文阿撮異聞以廣之及侯景寇逾簡文別遣文阿招募士卒入援京師城陷與張暉共保吳興暉敗文阿竄于山野景素聞其名求之甚急文阿窮迫不知所出登樹自縊遇有所親救之便自投而下折其左臂及景平高祖以文阿州里表爲原鄉令監江陰郡紹泰元年入爲國子博士尋領步兵校尉兼掌儀禮自泰清之亂臺閣故事無有存者文阿父峻梁武世嘗掌朝儀頗有遺藁於是斟酌裁撰禮度皆自之出及高祖受禪文阿輒棄官還武康高祖大怒發使往誅之時文阿宗人沈恪爲郡請使者寬其死卽面縛鎖頸致於高祖高祖視而笑曰腐儒復何爲者遂赦之高祖崩文阿與尚書左丞徐陵中書舍人劉師知等議大行皇帝靈座依御衣服之制語在師知傳及世祖卽皇帝位剋日謁廟尚書右丞庾持奉詔遣博士議其禮文阿議曰民物推移質文殊軌聖賢因機而立教王公隨時以適宜夫千人無君不散則亂萬乘無主不危則亡當隆周之日公旦叔父呂召爪牙成王在喪禍幾覆國是以旣葬便有公冠之儀始殯受麻冕之策斯蓋示天下以有主慮社稷之艱難逮乎



末葉縱橫漢承其弊雖文景刑厝而七國連兵或踰月  
卽尊或崩日稱詔此皆有爲而爲之非無心於禮制也  
今國諱之日雖抑哀於重紱之重猶未序於君臣之儀  
古禮朝廟退坐正寢聽羣臣之政今皇帝拜廟還宜御  
太極殿以正南面之尊此卽周康在朝一二臣衛者也  
其壤奠之節周禮以玉作贄公侯以珪子男執璧此瑞  
玉也奠贄旣竟又復致享天子以璧王后用琮秦燒經  
典威儀散滅叔孫通定禮尤失前憲奠贄不珪致享無  
帛公王同璧鴻臚奏賀若此數事未聞於古後相沿襲  
至梁行之夫稱觴奉壽家國大慶四廟雅樂歌奏懽欣  
今君臣吞哀萬民抑割豈同於惟新之禮乎且周康賓  
稱奉珪無萬壽之獻此則前準明矣三宿三咤上宗曰  
饗斯蓋祭飭受福寧謂賀酒邪愚以今坐正殿止行薦  
璧之儀無賀酒之禮謹撰謁廟還升正寢羣臣陪薦儀  
注如別詔可施行尋遷通直散騎常侍兼國子博士領  
羽林監仍令於東宮講孝經論語天嘉四年卒時年六  
十一詔贈廷尉卿文阿所撰儀禮八十餘卷經典大義  
十八卷竝行於世諸儒多傳其學

沈洙字弘道吳興武康人也祖休雅梁餘杭令父山卿  
梁國子博士中散大夫洙少方雅好學不妄交遊治三



禮春秋左氏傳精識彊記五經章句諸子史書問無不  
答解巾梁湘東王國左常侍轉中軍宣城王限內參軍  
板仁威臨賀王記室參軍遷尚書祠部郎中時年蓋二  
十餘大同中學者多涉獵文史不爲章句而洙獨積思  
經術吳郡朱异會稽賀琛甚嘉之及异琛於士林館講  
制旨義常使洙爲都講侯景之亂洙竄於臨安時世祖  
在焉親就習業及高祖入輔除國子博士與沈文阿同  
掌儀禮高祖受禪加員外散騎常侍歷揚州別駕從事  
史大匠卿有司奏前寧遠將軍建康令沈孝軌門生陳  
三兒牒稱主人翁靈柩在周主人奉使關內因欲迎喪  
久而未返此月晦卽是再周主人弟息見在此者爲至  
月未除靈內外卽吉爲待主人還情禮申竟以事諮左  
丞江德藻德藻議王衛軍云久喪不葬唯主人不變其  
餘親各終月數而除此蓋引禮文論在家內有事故未  
得葬者耳孝軌旣在異域雖已迎喪還期無指諸弟若  
遂不除永絕婚嫁此於人情或爲未允中原淪陷已後  
理有事例宜諮沈常侍詳議洙議曰禮有變正又有從  
宜禮小記云久而不葬者唯主祭者不除其餘以麻終  
月數者除喪則已注云其餘謂傍親如鄭所解衆子皆  
應不除王衛軍所引此蓋禮之正也但魏氏東關之役



既失亡屍柩葬禮無期議以爲禮無終身之喪故制使除服晉氏喪亂或死於虜庭無由迎殯江左故復申明其制李胤之祖王華之父竝存亡不測其子制服依時釋縗此竝變禮之宜也孝軌雖因奉使便欲迎喪而戎狄難親還期未刻愚謂宜依東關故事在此國內者竝應釋除縗麻毀靈附祭若喪柩得還別行改葬之禮自天下寇亂西朝傾覆流播絕域情禮莫申若此之徒諒非一二寧可喪期無數而弗除衰服朝廷自應爲之限制以義斷恩通訪博識折之禮哀德藻依洙議奏可世祖卽位遷通直散騎常侍侍東宮讀尋兼尚書左丞領揚州大中正遷光祿卿侍讀如故廢帝卽位重爲通直散騎常侍兼尚書左丞遷戎昭將軍輕車衡陽王長史行府國事帶琅邪彭城二郡丞梁代舊律測囚之法曰一上起自晡鼓盡于二更及比部郎范泉刪定律令以舊法測立時久非人所堪分其刻數日再上廷尉以爲新制過輕請集八座丞郎并祭酒孔奐行事沈洙五舍人會尚書省詳議時高宗錄尚書集衆議之都官尚書周弘正曰未知獄所測人有幾人款幾人不款須前責取人名及數并其罪日然後更集得廷尉監沈仲由列稱別制已後有壽羽兒一人坐殺壽慧劉磊渴等八人



坐偷馬仗家口渡北依法測之限訖不款劉道朔坐犯  
七改偷依法測立首尾二日而款陳法滿坐被使封藏  
阿法受錢未及上而款弘正議曰凡小大之獄必應以  
情正言依準五聽驗其虛實豈可全恣考掠以判刑罪  
且測人時節本非古制近代已來方有此法起自瞞鼓  
迄于二更豈是常人所能堪忍所以重械之下危懼之  
上無人不服誣枉者多朝晚二時同等刻數進退而求  
於事爲衷若謂小促前期致實罪不伏如復時節延長  
則無憾妄款且人之所堪既有彊弱人之立意固亦多  
途至如貫高榜笞刺爇身無完膚戴就熏針竝極困篤  
不移豈關時刻長短掠測優劣夫與殺不辜寧矢不經  
罪疑惟輕功疑惟重斯則古之聖王垂此明法愚謂依  
范泉著制於事爲允舍人盛權議曰比部范泉新制尚  
書周弘正明議咸允虞書惟輕之旨殷頌敷正之言竊  
尋廷尉監沈仲由等列新制以後凡有獄十一人其所  
測者十人款者唯一愚謂染罪之囚獄官宜明加辯析  
窮考事理若罪有可疑自宜啓審分判幸無濫測若罪  
有實驗乃可啓審測立此則枉直有分刑宥斯理范泉  
今牒述漢律云死罪及除名罪證明白考掠已至而抵  
隱不服者處當列上杜預注云處當證驗明白之狀到



其抵隱之意竊尋舊制深峻百中不款者一新制寬優  
十中不款者九參會兩文寬猛寔異處當列上未見釐  
革愚謂宜付典法更詳處當列上之文洙議曰夜中測  
立緩急易欺兼用晝漏於事爲允但漏刻賒促今古不  
同漢書律曆何承天祖冲之牘之父子漏經竝自關鼓  
至下鼓自晡鼓至關鼓皆十三刻冬夏四時不異若其  
日有長短分在中時前後今用梁末改漏下鼓之後分  
其短長夏至之日各十七刻冬至之日各十二刻伏承  
命旨刻同勒令檢一日之刻乃同而四時之用不等廷  
尉今牒以時刻短促致罪人不款愚意願去夜測之昧

從晝漏之明斟酌今古之間參會二漏之義捨秋冬之  
少刻從夏日之長晷不問寒暑竝依今之夏至朝夕上  
測各十七刻比之古漏則上多昔四刻卽用今漏則冬  
至多五刻雖冬至之時數刻侵夜正是少日於事非疑  
庶罪人不以漏短而爲捍獄囚無以在夜而致誣求之  
鄙意竊謂允合衆議以爲宜依范泉前制高宗曰沈長  
史議得中宜更博議左丞宗元饒議曰竊尋沈議非頓  
異范正是欲使四時均其刻數兼斟酌其佳以會優劇  
卽同牒請寫還刪定曹詳改前制高宗依事施行洙以  
太建元年卒時年五十二



戚袞字公文吳郡鹽官人也祖顯齊給事中父霸梁臨  
賀王府中兵參軍袞少聰慧遊學京都受三禮於國子  
助教劉文紹一二年中大義畧備年十九梁武帝勅策  
孔子正言并周禮禮記義袞對高第仍除揚州祭酒從  
事史就國子博士宋懷方質儀禮義懷方北人自魏攜  
儀禮禮記疏秘惜不傳及將亡謂家人曰吾死後戚生  
若赴便以儀禮禮記義本付之若其不來卽宜隨屍而  
殯其爲儒者推許如此尋兼太學博士梁簡文在東宮  
召袞講諭又嘗置宴集玄儒之士先命道學互相質難  
次令中庶子徐摛馳騁大義間以劇談摛辭辯縱橫難  
以答抗諸人懾氣皆失次序時袞說朝聘義摛與徒復  
袞精采自若對答如流簡文深加歎賞尋除員外散騎  
侍郎又遷員外散騎常侍敬帝承制出爲江州長史仍  
隨沈泰鎮南豫州泰之奔齊也逼袞俱行後自鄴下遁  
還又隨程文季北伐呂梁軍敗袞没于周久之得歸仍  
兼國子助教除中衛始興王府錄事參軍太建十三年  
卒時年六十三袞於梁代撰三禮義記值亂亡失禮記  
義四十卷行於世

鄭灼字茂昭東陽信安人也祖惠梁衡陽太守父季徽  
通直散騎侍郎建安令灼幼而聰敏勵志儒學少受業



于皇俛梁中大通五年釋褐奉朝請累遷員外散騎侍郎給事中安東臨川王府記室參軍轉平西邵陵王府記室簡文在東宮雅愛經術引灼爲西省義學士承聖中除通直散騎侍郎兼國子博士尋爲威戎將軍兼中書通事舍人高祖世祖之世歷安東臨川鎮北鄱陽二王府諮議參軍累遷中散大夫以本職兼國子博士未拜太建十三年卒時年六十八灼性精勤尤明三禮少時嘗夢與皇侃遇於途侃謂灼曰鄭郎開口侃因唾灼口中自後義理逾進灼家貧抄義疏以日繼夜筆毫盡每別用之灼常蔬食講授多苦心熱若瓜時輒偃卧以瓜鎮心起便誦讀其篤志如此時有晉陵張崖吳郡陸詡吳興沈德威會稽賀德基俱以禮學自命

張崖傳三禮於同郡劉文紹仕梁歷王府中記室天嘉元年爲尚書儀曹郎廣沈文阿儀注撰五禮出爲丹陽令王府諮議參軍御史中丞宗元饒表薦爲國子博士陸詡少習崔靈恩三禮義宗梁世百濟國表求講禮博士詔令詡行還除給事中定陽令天嘉初侍始興王伯茂讀遷尚書祠部郎中

沈德威字懷遠少有操行梁太清末遁於天目山築室以居雖處亂離而篤學無倦遂治經業天嘉元年徵出



都侍太子講禮傳尋授太學博士轉國子助教每自學還私室卽講投道俗受業者數十百人率常如此遷太常丞兼五禮學士尋爲尚書儀曹郎後爲祠部郎俄丁母憂去職禎明三年入隋官至秦王府主簿年五十五卒

賀德基字承業世傳禮學祖文發父淹仕梁俱爲祠部郎竝有名當世德基少遊學于京邑積年不歸衣資罄乏又恥服故弊盛冬止衣袂襦袴嘗於白馬寺前逢一婦人容服甚盛呼德基入寺門脫白綸巾以贈之仍謂德基曰君方爲重器不以貧寒故以此相遺耳德基問姬姓名不答而去德基於禮記稱爲精明居以傳授累遷尚書祠部郎德基雖不至大官而三世儒學俱爲祠部時論美其不墜焉

全緩字弘立吳郡錢塘人也幼受易于博士褚仲都篤志研翫得其精微梁太清初歷王國侍郎奉朝請俄轉國子助教兼司義郎專講詩易紹泰元年除尚書水部郎太建中累遷南始興王府諮議參軍隨府詣湘州以疾卒時年七十四緩治周易老莊時人言玄者咸推之張譏字直言清河武城人也祖僧寶梁散騎侍郎太子洗馬父仲悅梁廬陵王府錄事參軍尚書祠部郎中譏



幼聰俊有思理年十四通孝經論語篤好玄言受學于  
汝南周弘正每有新意爲先輩推服梁大同中召補國  
子正言生梁武帝嘗於文德殿釋乾坤文言譏與陳郡  
袁憲等預焉勅令論議諸儒莫敢先出譏乃整容而進  
諮審循環辭令溫雅梁武帝甚異之賜裙襦絹等仍云  
表卿稽古之力譏幼喪母有錯絲經帕卽母之遺製及  
有所識家人具以告之每歲時輒對帕哽噎不能自勝  
及丁父憂居喪過禮服闋召補湘東王國左常侍轉田  
曹參軍遷士林館學士簡文在東宮出土林館發孝經  
題譏論議往復甚見嗟賞自是每有講集必遣使召譏  
及侯景寇逆於圍城之中猶侍哀太子於武德後殿講  
老莊梁臺陷譏崎嶇避難卒不事景景平歷臨安令高  
祖受禪除太常丞轉始興王府刑獄參軍天嘉中遷國  
子助教是時周弘正在國學發周易題弘正第四弟弘  
直亦在講席譏與弘正論議弘正乃屈弘直危坐厲聲  
助其中理譏乃正色謂弘直曰今日義集辯正名理雖  
知兄弟急難四公不得有助弘直曰僕助君師何爲不  
可舉座以爲笑樂弘正嘗謂人曰吾每登座見張譏在  
席使人慄然高宗世歷建安王府記室參軍兼東宮學  
士轉武陵王限內記室學士如故後主在東宮集官僚



置宴時造玉柄麈尾新成後主親執之曰當今雖復多  
士如林至於堪捉此者獨張譏耳卽手授譏仍令於溫  
文殿講莊老高宗幸宮臨聽賜御所服衣一襲後主嗣  
位領南平王府諮議參軍東宮學士尋遷國子博士學  
士如故後主嘗幸鍾山開善寺召從臣坐於寺西南松  
林下勅召譏豎義時索麈尾未至後主勅取松枝手以  
屬譏曰可代麈尾顧謂羣臣曰此卽是張譏後事禎明  
三年入隋終於長安時年七十六譏性恬靜不求榮利  
常慕閑逸所居宅營山池植花果講周易老莊而教授  
焉吳郡陸元朗朱孟博一乘寺沙門法才法雲寺沙門  
慧休至真觀道士姚綬皆傳其業譏所撰周易義三十  
卷尚書義十五卷毛詩義二十卷孝經義八卷論語義  
二十卷老子義十一卷莊子內篇義十二卷外篇義二  
十卷雜篇義十卷玄部通義十二卷又撰遊玄桂林二  
十四卷後主嘗勅人就其家寫入秘閣子孝則官至始  
安王記室參軍

顧越字思南吳郡鹽官人也所居新坡黃岡世有鄉校  
由是顧氏多儒學焉越少孤以勤苦自立聰慧有口辯  
說毛氏詩傍通異義梁太子詹事周捨甚賞之解褐揚  
州議曹史兼太子左率丞越於義理精明尤善持論與



會稽賀文發俱爲梁南平王偉所重引爲賓客尋補五  
經博士紹泰元年遷國子博士世祖卽位除始興王諮  
議參軍侍東宮讀世祖以越篤老厚遇之除給事黃門  
侍郎又領國子博士侍讀如故廢帝嗣立除通直散騎  
常侍中書舍人華皎之構逾也越在東陽或譖之於高  
宗言其有異志詔下獄因坐免太建元年卒於家時年  
七十八時有東陽龔孟舒者亦治毛氏詩善談名理梁  
武世仕至尋陽郡丞元帝在江州遇之甚重躬師事焉  
承聖中兼中書舍人天嘉初除員外散騎常侍兼國子  
助教太中大夫太建中卒

沈不害字孝和吳興武康人也祖總齊尚書祠部郎父  
懿梁邵陵王參軍不害幼孤而脩立好學十四召補國  
子生舉明經累遷梁太學博士轉廬陵王府刑獄參軍  
長沙王府諮議帶汝南令天嘉初除衡陽王府中記室  
參軍兼嘉德殿學士自梁季喪亂至是國學未立不害  
上書曰臣聞立人建國莫尚於尊儒成俗化民必崇於  
教學故東膠西序事隆乎三代環林璧水業盛於兩京  
自淳源旣遠澆波已扇物之感人無窮人之逐欲無節  
是以設訓垂範啓導心靈譬彼染藍類諸琢玉然後人  
倫以睦卑高有序忠孝之理旣明君臣之道攸固執禮



自基魯公所以難侮歌樂已細鄭伯於是前亡于戚舞  
而有苗至泮宮成而淮夷服長想洙泗之風載懷淹覆  
之盛有國有家莫不尚已梁太清季年數鍾否剥戎狄  
外侵姦回內變朝聞鼓鼙夕炤烽火洪儒碩學解散甚  
於坑夷五典九丘湮滅逾乎帷蓋成均自斯墜業瞽宗  
於是不脩衰成之祠弗陳裸享釋菜之禮無稱俎豆頌  
聲寂寞遂踰一紀後生敦悅不見函丈之儀晚學鑽仰  
徒深倚席之歎陛下繼曆升統握鏡臨寓道洽寰中威  
加無外濁流已清重氛載廓舍生熙阜品庶咸亨宜其  
弘振禮樂建立庠序式稽古典紆迹儒宮選公卿門子  
皆入于學助教博士朝夕講肄使擔簦負笈銜銜接在  
方領矩步濟濟成林如切如磋聞詩聞禮一年可以功  
倍三冬於是足用故能擢秀雒州揚庭觀國入仕登朝  
資優學以自輔莅官從政有經業以治身轡駕列庭青  
紫拾地古者王世子之貴猶與國子齒降及漢儲茲禮  
不墜暨乎兩晉斯事彌隆所以見師嚴而道尊者也皇  
太子天縱生知無待審喻猶宜晦迹俯同專經請業奠  
爵前師肅若舊典昔闕里之堂草萊自闢舊宅之內絲  
竹流音前聖遺烈深以炯戒況復江表無虞海外有截  
豈得不開闡大猷恢弘至道寧可使玄教儒風弗興聖



世盛德大業遂蘊堯年臣末學小生詞無足筭輕獻瞽  
言伏增悚惕詔答曰省表聞之自舊章弛廢微言將絕  
朕嗣膺寶業念在緝熙而兵革未息軍國草創常恐前  
王令典一朝泯滅卿才思優洽文理可求弘惜大體殷  
勤名教付外詳議依事施行又表改定樂章詔使製三  
朝樂歌八首合二十八曲行之樂府五年除瀨令入爲  
尚書儀曹郎遷國子博士領羽林監勅治五禮掌策文  
論議太建中除仁武南康嗣王府長史行丹陽郡事轉  
員外散騎常侍光祿卿尋爲戎昭將軍明威武陵王長  
史行吳興郡事俄入爲通直散騎常侍兼尚書左丞十  
二年卒時年六十三不害治經術善屬文雖博綜墳典  
而家無卷軸每製文操筆立成曾無尋檢僕射汝南周  
弘正常稱之曰沈生可謂意聖人乎著治五禮儀一百  
卷文集十四卷子志道字崇基少知名解褐揚州主簿  
尋兼文林著士歷安東新蔡王記室參軍禎明三年入  
隋

王元規字正範太原晉陽人也祖道寶齊員外散騎常  
侍晉安郡守父瑋梁武陵王府中記室參軍元規八歲  
而孤兄弟三人隨母依舅氏往臨海郡時年十二郡主  
豪劉瑁者資財巨萬以女妻之元規母以其兄弟幼弱



欲結彊援元規泣請曰因不失親古人所重豈得苟安  
異壤輒婚非類母感其言而止元規性孝事母甚謹晨  
昏未嘗離左右梁時山陰縣有暴水流漂居宅元規唯  
有一小船倉卒引其母妹并孤姪入船元規自執楫棹  
而去留其男女三人閣於樹杪及水退獲全時人皆稱  
其至行元規少好學從吳興沈文阿受業十八通春秋  
左氏孝經論語喪服梁中大通元年詔策春秋舉高第  
時名儒咸稱賞之起家湘東王國左常侍轉員外散騎  
侍郎簡文之在東宮引爲賓客每令講論甚見優禮除  
中軍宣城王府記室參軍及侯景寇亂攜家屬還會稽  
天嘉中除始興王府功曹參軍領國子助教轉鎮東郡  
陽王府記室參軍領助教如故後主在東宮引爲學士  
親受禮記左傳喪服等義賞賜優厚遷國子祭酒新安  
王伯固嘗因入宮適會元規將講乃啓請執經時論以  
爲榮俄除尚書祠部郎自梁代諸儒相傳爲左氏學者  
皆以賈逵服虔之義難駁杜預凡一百八十條元規引  
證通析無復疑滯每國家議吉凶大禮常參預焉丁母  
憂去職服闋除鄱陽王府中錄事參軍俄轉散騎侍郎  
遷南平王府限內參軍王爲江州元規隨府之鎮四方  
學徒不遠千里來請道者常數十百人禎明三年入隋



爲秦王府東閣祭酒年七十四卒於廣陵元規著春秋  
發題辭及義記十一卷續經典大義十四卷孝經義記  
兩卷左傳音三卷禮記音兩卷子大業聰敏知名時有  
吳郡陸慶少好學遍知五經尤明春秋左氏傳節操甚  
高釋褐梁武陵王國右常侍歷征西府墨曹行參軍除  
婁令值梁季喪亂乃覃心釋典經論靡不該究天嘉初  
徵爲通直散騎侍郎不就永陽王爲吳郡太守聞其名  
欲與相見慶固辭以疾時宗人陸榮爲郡五官掾慶嘗  
詣焉王乃微服往榮第穿壁以觀之王謂榮曰觀陸慶  
風神凝峻殆不可測豈君平鄭子真何以尚茲鄱陽晉  
安王俱以記室徵竝不就乃築室屏居以禪誦爲事由  
是傳經受業者蓋鮮焉

史臣曰夫砥身勵行必先經術樹國崇家率由茲道故  
王政因之而至治人倫得之而攸序若沈文阿之徒各  
專經授業亦一代之鴻儒焉文阿加復草創禮儀蓋叔  
孫通之流亞矣



陳書卷三十四

列傳第二十八

唐散騎常侍姚思廉撰

文學

杜之偉

顏晃

江德藻

庾持

康熙二十五年重修

陳書卷三十四

列傳



許亨

褚玠

岑之敬

陸琰

弟瑜

瑜從父

兄玠

從父弟琛

何之元

徐伯陽

張正見

蔡凝

阮卓

易曰觀乎人文以化成天下孔子曰煥乎其有文章也

自楚漢以降辭人世出洛 泗江左其流彌暢莫不思侔造化明竝日月大則憲章 典謨禪贊王道小則文理清正申紆性靈至於經禮樂綵人倫通古今述美惡莫尚乎此後主嗣業雅尚文詞 傍求學藝煥乎俱集每臣下表疏及獻上賦頌者躬自省覽其有辭工則神筆賞激加其爵位是以搢紳之徒咸知自勵矣若名位文學是著者別以功迹論今綴杜之偉等學既兼文備于此篇云爾

杜之偉字子大吳郡錢塘人也家世儒學以三禮專門父規梁奉朝請與光祿大夫濟陽江革都官尚書會稽



孔休源友善之偉幼精敏有逸才七歲受尚書稍習詩禮畧通其學十五遍觀文史及儀禮故事時輩稱其早成僕射徐勉嘗見其文重其有筆力中大同元年梁武帝幸同泰寺捨身勅勉撰定儀註勉以臺閣先無此禮召之偉草具其儀乃啓補東宮學士與學士劉陟等鈔撰羣書各爲題目所撰富教政道二篇皆之偉爲序及湘陰侯蕭昂爲江州刺史以之偉掌記室昂卒廬陵王續代之又手教招引之偉思辭不應命乃送昂喪柩還京仍侍臨成公讀尋除揚州議曹從事南康嗣王墨曹參軍兼太學限內博士七年梁皇太子釋奠於國學時樂府無孔子顏子登歌詞尚書參議令之偉製其文伶人傳習以爲故事轉補安前邵陵王田曹參軍又轉刑獄參軍之偉年位甚卑特以彊識俊才頗有名當世吏部尚書張纘深知之以爲廊廟器也侯景反之偉逃竄山澤及高祖爲丞相素聞其名召補記室參軍遷中書侍郎領大著作高祖受禪除鴻臚卿餘竝如故之偉啓求解著作曰臣以紹泰元年忝中書侍郎掌國史于今四載臣本庸賤謬蒙盼識思報恩獎不敢廢官皇曆惟新驅馭軒昊記言記事未易其人著作之材更宜選衆御史中丞沈炯尚書左丞徐陵梁前兼大著作虞荔梁



前黃門侍郎孔奐或清文瞻筆或彊識稽古遷董之任  
允屬羣才臣無容遽變市朝再妨賢路堯朝皆讓誠不  
可追陳力就列庶幾知免優勅不許尋轉大匠卿遷太  
中大夫仍勅撰梁史永定三年卒時年五十二高祖甚  
悼惜之詔贈通直散騎常侍賻錢五萬布五十匹棺一  
具克日舉哀之偉爲文不尚浮華而溫雅博瞻所製多  
遺失存者十七卷

顏晃字元明琅邪臨沂人也少孤貧好學有辭采解禮  
梁邵陵王兼記室參軍時東宮學士庾信嘗使于府中  
王使晃接對信輕其尚少曰此府兼記室幾人晃答曰  
猶當少於宮中學士當時以爲善對侯景之亂西奔荆  
州承聖初除中書侍郎時杜龕爲吳興太守專好勇力  
其所部多輕險少年元帝患之乃使晃管其書翰仍勅  
龕曰卿年時尚少習讀未晚顏晃文學之士使相毗佐  
造次之間必宜諮稟及龕誅晃歸世祖世祖委以書記  
親遇甚篤除宣毅府中錄事兼記室參軍永定二年高  
祖幸大莊嚴寺其夜甘露降晃獻甘露頌詞義該典高  
祖甚奇之天嘉初遷員外散騎常侍兼中書舍人掌詔  
誥三年卒時年五十三詔贈司農卿諡曰貞子并賜墓  
地晃家世單門傍無戚援而介然脩立爲當世所知其



表奏詔誥下筆立成便得事理而雅有氣質有集二十卷

江德藻字德藻濟陽考城人也祖柔之齊尚書倉部郎中父革梁度支尚書光祿大夫德藻好學善屬文美風儀身長七尺四寸性至孝事親盡禮與異產昆弟居恩惠甚篤起家梁南中郎武陵王行參軍大司馬南平王蕭偉聞其才召爲東閣祭酒遷安西湘東王府外兵參軍尋除尚書比部郎以父憂去職服闋之後容貌毀瘠如居喪時除安西武陵王記室不就久之授廬陵王記室參軍除廷尉正尋出爲南充州治中及高祖爲司空征北將軍引德藻爲府諮議轉中書侍郎遷雲麾臨海王長史陳臺建拜尚書吏部侍郎高祖受禪授秘書監兼尚書左丞尋以本官兼中書舍人天嘉四年兼散騎常侍與中書郎劉師知使齊著北征道理記三卷還拜太子中庶子領步兵校尉頃之遷御史中丞坐公事免尋拜振遠將軍通直散騎常侍自求宰縣出補新喻令政尚恩惠頗有異績六年卒於官時年五十七世祖甚悼惜之詔贈散騎常侍所著文筆十五卷子椿亦善屬文歷太子庶子尚書左丞

庾持字允德潁川鄆陵人祖佩玉宋長沙內史父沙彌



梁長城令持少孤性至孝居父憂過禮篤志好學尤善  
書記以才藝聞解褐梁南平王國左常侍輕車河東王  
府行參軍兼尚書郎尋而爲真出爲安吉令遷鎮東邵  
陵王府限外記室兼建康令天監初世祖與持有舊及  
世祖爲吳興太守以持爲郡丞兼掌書翰自是常依文  
帝文帝剋張彪鎮會稽又令持監臨海郡以貪縱失民  
和爲山盜所劫幽執十旬世祖遣劉澄討平之持乃獲  
免高祖受禪授安東臨川王府諮議參軍天嘉初遷尚  
書左丞以預長城之功封崇德縣子邑三百戶拜封之  
日請令史爲客受其餉遺世祖怒之因坐免尋爲宣惠  
始興王府諮議參軍除臨安令坐杖殺縣民免封遷爲  
給事黃門侍郎除稜威將軍鹽官令光大元年遷秘書  
監知國史事又爲少府卿領羽林監遷太中大夫領步  
兵校尉太建元年卒時年六十二詔贈光祿大夫持善  
字書每屬辭好爲奇字文士亦以此譏之有集十卷  
許亨字亨道高陽新城人晉徵士詢之六世孫也會祖  
珪歷給事中委桂陽太守高尚其志居未興之究山卽  
詢之所隱也祖勇慧齊太子家令穴從僕射父懋梁始  
平天門二郡守太子中庶子散騎常侍以學藝聞撰毛  
詩風雅比興義類十五卷述行記四卷亨少傳家業孤



介有節行博通羣書多識前代舊事名輩皆推許之甚  
爲南陽劉之遴所重每相稱述解褐梁安東王行參軍  
兼太學博士尋除平西府記室參軍太清初爲征西中  
記室兼太常丞侯景之亂避地郢州會梁邵陵王自東  
道至引爲諮議參軍王僧辯之襲郢州也素聞其名召  
爲儀同從事中郎遷太尉從事中郎與吳興沈炯對掌  
書記府朝政務一以委焉晉安王承制授給事黃門侍  
郎亨奉牋辭府僧辯答曰省告承有朝授良爲德舉卿  
操尚惇深文藝該洽學優而官自致青紫况久羈駿足  
將成頓轡匡輔虛闇期寄實深旣欣遊處用忘勞屈而  
枳棘栖鷓常以增歎文郎之選雖爲清顯位以才升差  
自無愧且卿始云知命方騁康衢未有執戟之疲使深  
夜行之慨循復來翰殊用憮然古人相思千里命駕素  
心不昧寧限城闔存顧之深荒慙無已高祖受禪授中  
散大夫領羽林監遷太中大夫領大著作知梁史事初  
僧辯之誅也所司收僧辯及其子頽屍於方山同坎埋  
瘞至是無敢言者亨以故吏抗表請葬之乃與故義徐  
陵張種孔奐等相率以家財營葬凡七柩皆改窆焉光  
大初高宗入輔以亨貞正有古人之風甚相欽重常以  
師禮事之及到仲舉之謀出高宗也毛喜知其詐高宗



問亨亨勸勿奉詔高宗卽位拜衛尉卿太建二年卒時年五十四初撰齊書并志五十卷遇亂失亡後撰梁史成者五十八卷梁太清之後所製文筆六卷子善心學知名官至尚書度支侍郎

褚玠字溫理河南陽翟人也曾祖炫宋昇明初與謝朓江斆劉侯入侍殿中謂之四友官至侍中吏部尚書諡貞子祖澧梁御史中丞父蒙太子舍人玠九歲而孤爲叔父驃騎從事中郎隨所養早有令譽先達多以才器許之及長美風儀善占對博學能屬文詞義典實不好豔靡起家王府法曹歷轉外兵記室天嘉中兼通直散騎常侍聘齊還爲桂陽王友遷太子庶子中書侍郎太建中山陰縣多豪猾前後令皆以贓汙免高宗患之謂中書舍人蔡景歷曰稽陰大邑久無良宰卿文士之內試思其人景歷進曰褚玠廉儉有幹用未審堪其選不高宗曰甚善卿言與朕意同乃除戎昭將軍山陰令縣民張次的王休達等與諸猾吏賄賂通姦全丁大戶類多隱沒玠乃鎖次的等具狀啓臺高宗手勅慰勞并遣使助玠搜括所出軍民八百餘戶時舍人曹義達爲高宗所寵縣民陳信家富於財諂事義達信父顯文恃勢橫暴玠乃遣使執顯文鞭之一百於是吏民股慄莫敢



犯者信後因義達譖玠竟坐免官玠在任歲餘守祿俸而已去官之日不堪自致因留縣境種蔬菜以自給或嗤玠以非百里之才玠答曰吾委輸課最不後列城除殘去暴姦吏局躋若謂其不能自潤脂膏則如來命以爲不達從政吾未服也時人以爲信然皇太子知玠無還裝手書賜粟米二百斛於是還都太子愛玠文辭令入直殿省十年除電威將軍仁威淮南王長史頃之以本官掌東宮管記十二年遷御史中丞卒于官時年五十二玠剛毅有膽決兼善騎射嘗從司空侯安都於徐州出獵遇有猛虎玠引弓射之再發皆中口入腹俄而虎斃及爲御史中丞甚有直繩之稱自梁末喪亂朝章廢弛司憲因循守而勿革玠方欲改張大爲條例綱維畧舉而編次未訖故不列于後焉及卒太子親製誌銘以表惟舊至德二年追贈秘書監所製章奏雜文二百餘篇皆切專理由是見重於時子亮有才學官至尚書殿中侍郎

岑之敬字思禮南陽棘陽人也父善紆梁世以經學聞官至吳寧令司義郎之敬年五歲讀孝經每燒香正坐親戚咸加歎異年十六策春秋左氏制旨孝經義擢爲高第御史奏曰皇朝多士例止明經若顏閔之流乃應



高第梁武帝省其策曰何妨我復有顏閔邪因召入面  
試令之敬升講座勅中書舍人朱异執孝經唱士孝章  
武帝親自論難之敬剖釋縱橫應對如響左右莫不嗟  
服乃除童子奉車郎賞賜優厚十八預重雲殿法會時  
武帝親行香熟視之敬曰未幾見兮突而弁兮即日除  
太學限內博士尋爲壽光學士司義郎又除武陵王安  
西府刑獄參軍事太清元年表請試吏除南沙令侯景  
之亂之敬率所部赴援京師至郡境聞臺城陷乃與衆  
辭訣歸鄉里承聖二年除晉安王宣惠府中記室參軍  
是時蕭勃據嶺表勅之敬宣旨慰喻會江陵陷仍留廣  
州太建初還朝授東宮義省學士太子素聞其名尤降  
賞接累遷鄱陽王中衛府記室鎮北府中錄事參軍南  
臺治書侍御史征南府諮議參軍之敬始以經業進而  
博涉文史雅有詞筆不爲醇儒性謙謹未嘗以才學矜  
物接引後進恂恂如也每忌日營齋必躬自洒掃涕泣  
終日士君子以篤行稱之十一年卒時年六十一太子  
嗟惜賻贈甚厚有集十卷行於世子德潤有父風官至  
中軍吳興王記室

陸琰字溫玉吏部尚書瓊之從父弟也父令公梁中軍  
宣城王記室參軍琰幼孤好學有志操州舉秀才解褐



宣惠始興王行參軍累遷法曹外兵參軍直嘉德殿學士世祖聽覽餘暇頗留心史籍以琰博學善占誦引置左右嘗使製刀銘琰援筆卽成無所點竄世祖嗟賞久之賜衣一襲俄兼通直散騎常侍副琅邪王厚聘齊及至鄴下而厚病卒琰自爲使主時年二十餘風神韶亮占對閑敏齊士大夫甚傾心焉還爲雲麾新安王主簿遷安成王長史寧遠府記室參軍太建初爲武陵王明威府功曹史兼東宮管記丁母憂去官五年卒時年三十四太子甚傷悼之手令舉哀加其賻贈又自製誌銘至德二年追贈司農卿琰寡嗜慾鮮衿競遊心經籍晏如也其所製文筆多不存本後主求其遺文撰成二卷有弟瑜

瑜字幹玉少篤學美詞藻州舉秀才解褐驃騎安成王行參軍轉軍師晉安王外兵參軍東宮學士兄琰時爲管記竝以才學娛侍左右時人比之二應太建二年太子釋奠于太學宮臣竝賦詩命瑜爲序文甚瞻麗遷尚書祠部郎中丁母憂服闋爲桂陽王明威將軍功曹史兼東宮管記累遷永陽王文學太子洗馬中舍人瑜幼長讀書晝夜不廢聰敏彊記一覽無遺嘗受莊老於汝南周弘正學成實論於僧滔法師竝通大旨時皇太子



好學欲博覽羣書以子集繁多命瑜鈔撰未就而卒時  
年四十四太子爲之流涕手令舉哀宮給喪事并親製  
文遣使弔祭仍與詹事江總書曰管記陸瑜奄然殞化  
悲傷悼惜此情何已吾生平愛好卿等所悉自以學涉  
儒雅不逮古人欽賢慕士是情尤篤梁室亂離天下糜  
沸書史殘缺禮樂崩淪晚生後學匪無牆面卓爾出羣  
斯人而已吾識覽雖局未曾以言議假人至於片善小  
才特用嗟賞况復洪識奇士此故忘言之地論其博綜  
子史諳究儒墨經耳無遺觸目成誦一褒一貶一激一  
揚語玄析理披文摘句未嘗不聞者心伏聽者解頤會  
意相得自以爲布衣之賞吾監撫之暇事隙之辰頗用  
譚笑娛情琴樽閒作雅篇豔什迭互鋒起每清風朗月  
美景良辰對羣山之參差望巨波之滉漾或翫新花時  
觀落葉旣聽春鳥又聆秋鴈未嘗不促膝舉觴連情發  
藻且代琢磨閒以嘲諢俱怡耳目竝留情致自謂百年  
爲速朝露可傷豈謂玉折蘭摧遽從短運爲悲爲恨當  
復何言遺迹餘文觸目增泫絕絃投筆恒有酸梗以卿  
同志聊復敘懷涕之無從言不寫意其見重如此至德  
二年追贈光祿卿有集十卷瑜從父兄玠從父弟琛  
玠字潤玉梁大匠卿晏之子弘雅有識度好學能屬文



舉秀才對策高第吏部尚書袁樞薦之於世祖超授衡陽王文學直天保殿學士太建初遷長沙王友領記室後主在東宮聞其名徵爲管記仍除中舍人管記如故甚見親待尋以疾失明將還鄉里太子解衣贈玠爲之流涕八年卒時年三十七有令舉哀并加賜贈至德二年追贈少府卿有集十卷

琛字潔玉宣毅臨川王長史丘公之子少警俊事後母以孝聞世祖爲會稽太守琛年十八上善政頌甚有詞采由此知名舉秀才起家爲衡陽王主簿兼東宮管記歷豫章王文學領記室司徒主簿直宣明殿學士尋遷

尚書三公侍郎兼通直散騎常侍聘齊還爲司徒左西掾又掌東宮管記太子愛琛才辯深禮遇之後主嗣位遷給事黃門侍郎中書舍人參掌機密琛性頗疎坐漏洩禁中語詔賜死時年四十二

何之元廬江瀟人也祖僧達齊南臺治書侍御史父法勝以行業聞之元幼好學有才思居喪過禮爲梁司空袁昂所重天監末昂表薦之因得召見解褐梁太尉臨川王揚州議曹從事史尋轉主簿及昂爲丹陽尹辟爲丹陽五官掾總戶曹事尋除信義令之元宗人敬容者勢位隆重類相顧訪之元終不造焉或問其故之元曰



昔楚人得寵於觀起有馬者皆亡夫德薄任隆必近覆  
敗吾恐不獲其利而招其禍識者以是稱之會安西武  
陵王爲益州刺史以之元爲安西刑獄參軍侯景之亂  
武陵王以太尉承制授南梁州長史北巴西太守武陵  
王自成都舉兵東下之元與蜀中民庶抗表請無行王  
以爲沮衆囚之元于艦中及武陵兵敗之元從邵陵太  
守劉恭之郡俄而江陵陷劉恭卒王琳召爲記室參軍  
梁敬帝冊琳爲司空之元除司空府諮議參軍領記室  
王琳之立蕭莊也署爲中書侍郎會齊文宣帝薨令之  
元赴弔還至壽春而王琳敗齊主以爲揚州別駕所治  
卽壽春也及衆軍北伐得淮南地湘州刺史始興王叔  
陵遣功曹史柳斌賫書召之元之元始與朝廷有隙及  
書至大惶恐讀書至孔璋無罪左車見用之元仰而歎  
曰辭旨若此豈欺我哉遂隨感至湘州太建八年除中  
衛府功曹參軍事尋遷諮議參軍及叔陵誅之元乃屏  
絕人事銳精著述以爲梁氏肇自武皇終于敬帝其興  
亡之運盛衰之跡足以垂鑒戒定褒貶究其始終起齊  
末元元年迄于王琳遇獲七十五年行事草創爲三十  
卷號曰梁典其序曰記事之史其流不一編年之作無  
若春秋則魯史之書非帝皇之籍也案三皇之簡爲三



墳五帝之策爲五典此典義所由生也至乃尚書述唐  
帝爲堯典虞帝爲舜典斯又經文明據是以典之爲義  
久矣哉若夫馬史班漢述帝稱紀自茲厥後因相祖習  
及陳壽所撰名之曰志總其三國分路揚鑣唯何法盛  
晉書變帝紀爲帝典旣云師古在理爲優故今之所作  
稱爲梁典梁有天下自中大同以前區寓寧晏太清以  
後寇盜交侵首尾而言未爲盡美故開此一書分爲六  
意以高祖創基因乎齊末尋宗討本起自永元今以前  
如干卷爲追述高祖生自布衣長於弊俗知風教之臧  
否識民黎之情僞爰遠君臨弘斯政術四紀之內寔云  
殷阜今以如干卷爲太平世不常夷時無恒治非自我  
後仍屬橫流今以如干卷爲致亂洎高祖晏駕之年太  
宗幽辱之歲謳歌獄訟向西陝不向東都不庭之民流  
逸之士征伐禮樂歸世祖不歸太宗撥亂反正厥庸斯  
在治定功成其勲有屬今以如干卷爲世祖至於四海  
困窮五德升替則敬皇紹立仍以禪陳今以如干卷爲  
敬帝驃騎王琳崇立後嗣雖不達天命然是其忠節今  
以如干卷爲後嗣主至在太宗雖加美謚而夫寶之號  
世所不遵蓋以拘於賊景故也承聖紀歷自接太清神  
筆詔書非宜輒改詳之後論蓋有理焉夫事有始終人



有業行本末之間頗宜詮敘案臧榮緒稱史無裁斷猶起居注耳由此而言寔資詳悉又編年而舉其歲次者蓋取分明而易尋也若夫獫狁孔熾鯁我中原始自一君終爲二主事有相涉言成混漫今以未分之前爲北魏旣分之後高氏所輔爲東魏宇文所挾爲西魏所以相分別也重以蓋彰殊體繁省異文其間損益頗有凡例禎明三年京城陷乃移居常州之晉陵縣隋開皇十三年卒于家

徐伯陽字隱忍東海人也祖度之齊南徐州議曹從事史父僧權梁東宮通事舍人領秘書以善書知名伯陽敏而好學善色養進止有節年十五以文筆稱學春秋左氏家有史書所讀者近三千餘卷試策高第尚書板補梁河東王國右常侍東宮學士臨川嗣王府墨曹參軍大同中出爲候官令甚得民和侯景之亂伯陽浮海南至廣州依於蕭勃勃平還朝仍將家屬之吳郡天嘉二年詔侍晉安王讀尋除司空侯安都府記室參軍事安都素聞其名見之降席爲禮甘露降樂遊苑詔賜安都令伯陽爲謝表世祖覽而奇之太建初中記室李爽記室張正見左民郎賀徹學士阮卓黃門郎蕭詮三公郎王由禮處士馬樞記室祖孫登比部賀循長史劉刪



等爲文會之友後有蔡凝劉助陳暄孔範亦預焉皆一時之士也遊宴賦詩勒成卷軸伯陽爲其集序盛傳於世及新安王爲南徐州刺史除鎮北新安王府中記室參軍兼南徐州別駕帶東海郡丞鄱陽王爲江州刺史伯陽嘗奉使造焉王率府僚與伯陽登匡嶺置宴酒酣命筆賦劇韻二十伯陽與祖孫登前成王賜以奴婢雜物及新安王還京除臨海嗣王府限外諮議參軍十一年春皇太子幸太學詔新安王於辟雍發論語題仍命伯陽爲辟雍頌甚見嘉賞除鎮右新安王府諮議參軍事十三年聞姊喪發疾而卒時年六十六

張正見字見贖清河東武城人也祖蓋之魏散騎常侍勃海長樂二郡太守父脩禮魏散騎侍郎歸梁仍拜本職遷懷方太守正見幼好學有清才梁簡文在東宮正見年十三獻頌簡文深贊賞之簡文雅尚學業每自升座說經正見嘗預講筵請決疑義吐納和順進退詳雅四座咸屬目焉太清初射策高第除邵陵王國左常侍梁元帝立拜通直散騎侍郎遷彭澤令屬梁季喪亂避地於匡俗山時焦僧度擁衆自保遣使請交正見懼之遂辭延納然以禮法自持僧度亦雅相敬憚高祖受禪詔正見還都除鎮東鄱陽王府墨曹行參軍兼衡陽王



府長史歷宜都王限外記室撰史著士帶尋陽郡丞累  
遷尚書度支郎通直散騎侍郎著士如故太建中卒時  
年四十九有集十四卷其五言詩尤善大行於世

蔡凝字子居濟陽考城人也祖搏梁吏部尚書金紫光  
祿大夫父彥高梁給事黃門侍郎凝幼聰晤美容止既  
長博涉經傳有文辭尤工草隸天嘉四年釋褐受秘書  
郎轉廬陵王文學光大元年除太子洗馬司徒主簿太  
建元年遷太子中舍人以名公子選尚信義公主拜駙  
馬都尉中書侍郎遷晉陵太守及將之郡更令左右緝  
治中書廨宇謂賓友曰庶來者無勞不亦可乎尋授寧

遠將軍尚書吏部侍郎凝在位未高而才地爲時所重  
常端坐西齋自非素貴名流罕所交接趣時者多譏焉  
高祖常謂凝曰我欲用義興王壻錢肅爲黃門郎卿意  
何如凝正色對曰帝鄉舊戚恩由聖旨則無所復問若  
格以僉議黃散之職故須人門兼美惟陛下裁之高宗  
默然而止肅聞而有憾令義興主日譖之於高宗尋免  
官遷交趾頃之追還後主嗣位授晉安王諮議參軍轉  
給事黃門侍郎後主嘗置酒會羣臣歡甚將移醺於弘  
範宮衆人咸從唯凝與袁憲不行後主曰卿何爲者凝  
對曰長樂尊嚴非酒後所過臣不敢奉詔衆人失色後



主曰卿醉矣卽令引出他日後主謂吏部尚書蔡徵曰  
蔡凝負地矜才無所用也尋遷信威晉熙王府長史鬱  
鬱不得志乃喟然歎曰天道有廢興夫子云樂天知命  
斯理庶幾可達因製小室賦以見志甚有辭理陳亡入  
隋道病卒時年四十七子君知頗知名

阮卓陳留尉氏人祖詮梁散騎侍郎父問道梁寧遠岳  
陽王府記室參軍卓幼而聰敏篤志經籍善談論尤工  
五言詩性至孝其父隨岳陽王出鎮江州遇疾而卒卓  
時年十五自都奔赴水漿不入口者累日屬侯景之亂  
道路阻絕卓冒履險艱載喪柩還都在路遇賊卓形容

毀瘁號哭自陳賊哀而不殺之仍護送出境及渡彭蠡  
湖中流忽遇疾風船幾沒者數四卓仰天悲號俄而風  
息人皆以爲孝感之至焉世祖卽位除輕車鄱陽王府  
外兵參軍天康元年轉雲麾新安王府記室參軍仍隨  
府轉翌右記室帶撰史著士遷鄱陽王中衛府錄事轉  
晉安王府記室著士如故及平歐陽紇交阯夷獠往往  
相聚爲寇抄卓奉使招慰交阯通日南象郡多金翠珠  
貝珍怪之產前後使者皆致之唯卓挺身而還衣裝無  
他時論咸服其廉遷衡陽王府中錄事參軍入爲尚書  
祠部郎遷始興王中衛府記室參軍叔陵之誅也後主



謂朝臣曰阮卓素不同途宜加旌異至德元年入爲德  
教殿學士尋兼通直散騎常侍副王話聘隋主夙聞  
卓名乃遣河東薛道衡琅邪顏之推等與卓談醮賦詩  
賜遺加禮還除招遠將軍南海王府諮議參軍以目疾  
不之官退居里舍改構亭宇脩山池卉木招致賓友以  
文酒自娛禎明三年入于隋行至江州追感其父所終  
因遘疾而卒時年五十九時有武威陰鏗字子堅梁左  
衛將軍子春之子幼聰慧五歲能誦詩賦日千言及長  
博涉史傳尤善五言詩爲當時所重釋褐梁湘東王法  
曹參軍天寒鏗嘗與賓友宴飲見行觴者因回酒炙以

授之衆坐皆笑鏗曰吾儕終日酣飲而執爵者不知其  
味非人情也及侯景之亂鏗嘗爲賊所擒或救之獲免  
鏗問其故乃前所行觴者天嘉中爲始興王府中錄事  
參軍世祖嘗醮羣臣賦詩徐陵言之於世祖卽日召鏗  
預醮使賦新成安樂宮鏗援筆便就世祖甚歎賞之累  
遷招遠將軍晉陵太守員外散騎常侍頃之卒有集三  
卷行於世

史臣曰夫文學者蓋人倫之所基歟是以君子異乎衆  
庶昔仲尼之論四科始乎德行終於文學斯則聖人亦  
所貴也至於杜之偉之徒值於休運各展才用之偉尤



著美焉

陳書卷三十四終

陳書卷三十五

列傳第二十九

唐散騎常侍姚思廉撰

熊曇朗

周迪

留異

陳寶應

熊曇朗豫章南昌人也世為郡著姓曇朗跡弛不羈有



膂力容貌甚偉侯景之亂稍聚少年據豐城縣爲柵築  
黠劫盜多附之梁元帝以爲巴山太守荊州陷曇朗兵  
力稍彊劫掠隣縣縛賣居民山谷之中最爲巨患及侯  
瑱鎮豫章曇朗外示服從陰欲圖瑱侯方兒之反瑱也  
曇朗爲之謀主瑱敗曇朗獲瑱馬仗子女甚多及蕭勃  
踰嶺歐陽頴爲前軍曇朗給頴共往巴山襲黃法蕤又  
報法蕤期共破頴約曰事捷與我馬仗及出軍與頴掎  
角而進又給頴曰余孝頃欲相掩襲須分留奇兵甲仗  
旣少恐不能濟頴乃送甲三百領助之及至城下將戰  
曇朗僞北法蕤乘之頴矢搖狼狽退衄曇朗取其馬仗  
而歸時巴山陳定亦擁兵立寨曇朗僞以女妻定子又  
謂定子曰周迪余孝頃並不願此婚必須以彊兵來迎定  
乃遣精甲三百并土豪二十人往迎旣至曇朗執之收  
其馬仗竝論價責贖紹泰二年曇朗以南川豪帥隨例  
除游騎將軍尋爲持節颯猛將軍桂州刺史資領豐城  
令歷宜新豫章二郡太守王琳遣李孝欽等隨余孝頃  
於臨川攻周迪曇朗率所領赴援其年以功除持節通  
直散騎常侍寧遠將軍封永化縣侯邑一千戶給鼓吹  
一部又以抗禦王琳之功授平西將軍開府儀同三司  
餘竝如故及周文育攻余孝勣於豫章曇朗出軍會之



文育失利曇朗乃害文育以應王琳事見文育傳於是  
盡執文育所部諸將據新淦縣帶江爲城王琳東下世  
祖徵南川兵江州刺史周迪高州刺史黃法蕤欲泐流  
應赴曇朗乃據城列艦斷遏迪等與法蕤因帥南中兵  
築城圍之絕其與琳信使及王琳敗走曇朗黨援離心  
迪攻陷其城虜其男女萬餘口曇朗走入村中村民斬  
之傳首京師懸于朱雀觀於是盡收其黨族無少長皆  
棄市

周迪臨川南城人也少居山谷有膂力能挽彊弩以弋  
獵爲事侯景之亂迪宗人周續起兵於臨川梁始興王  
蕭毅以郡讓續迪召募鄉人從之每戰必勇冠衆軍續  
所部渠帥皆郡中豪族稍驕橫續頗禁之渠帥等竝怨  
望乃相率殺續推迪爲主迪乃據有臨川之地築城于  
工塘梁元帝授迪持節通直散騎常侍壯武將軍高州  
刺史封臨汝縣侯邑五百戶紹泰二年除臨川內史尋  
授使持節散騎常侍信威將軍衡州刺史領臨川內史  
周文育之討蕭勃也迪按甲保境以觀成敗文育使長  
史陸山才說迪迪乃大出糧餉以資文育勃平以功加  
振遠將軍遷江州刺史高祖受禪王琳東下迪欲自據  
南川乃總召所部八郡守宰結盟聲言入赴朝廷恐其



爲變因厚慰撫之琳至湓城新吳洞主余孝頃舉兵應  
琳琳以爲南川諸郡可傳檄而定乃遣其將李孝欽樊  
猛等南徵糧餉猛等與余孝頃相合衆且二萬來趨工  
塘連入城以逼迺使周敷率衆頓臨川故郡截斷江  
口因出與戰大敗之屠其入城生擒李孝欽樊猛余孝  
頃送于京師收其軍實器械山積并虜其人馬迺並自  
納之永定二年以功加平南將軍開府儀同三司增邑  
一千五百戶給鼓吹一部世祖嗣位進號安南將軍熊  
曇朗之反也迺與周敷黃法氈等率兵共圍曇朗屠之  
盡有其衆王琳敗後世祖徵迺出鎮湓城又徵其子入  
朝迺赧赧顧望竝不至豫章太守周敷本屬於迺至是  
與黃法氈率其所部詣闕世祖錄其破熊曇朗之功竝  
加官賞迺聞之甚不平乃陰與留異相結及王師討異  
迺疑懼不自安乃使其弟方興率兵襲周敷敷與戰破  
之又別使兵襲華皎於湓城事覺盡爲皎所擒三年春  
世祖乃下詔赦南川士民爲迺所誣者使江州刺史  
吳明徹都督衆軍與高州刺史黃法氈豫章太守周敷  
討迺於是尚書下符曰告臨川郡士庶昔西京爲盛信  
越背誕東都中興萌寵違戾是以鷹鷂競逐菹醢極誅  
自古有之其來尚矣逆賊周迺本出輿臺有梁喪亂暴



掠山谷我高祖躬率百越師次光川濯其泥沙假以毛  
羽裁解豚佩仍剖虎符卵翼之恩方斯莫喻皇運肇基  
頗布誠款國步艱阻竟微効力龍節繡衣藉王爵而御  
下熊旗組甲因地險而陵上日者王琳始貳蕭勃未夷  
西結三湘南通五嶺衡廣勘定旣安反側江郢紛梗復  
生攜背擁據一郡苟且百心志貌常違言迹不副特以  
新吳未靜地遠兵彊互相兼并成其形勢收獲器械俘  
虜士民竝曰私財曾無獻捷時遣一介終持兩端朝廷  
光大舍弘引納崇遇遂乃位等三槐任均四嶽富貴隆  
赫超絕功臣加以出師逾嶺遠相響援按甲斷江翻然  
猜拒故司空愍公敦以宗盟情同骨肉城池連接勢猶  
唇齒彭亡之禍坐觀難作階此疊故結其黨與于時北  
寇侵軼西賊憑陵扉屢糗糧悉以資寇爵號軍容一遵  
僞黨及王師凱振大定區中天網恢弘棄之度外璽書  
綸誥撫慰綢繆冠蓋縉紳敦授重疊至於熊曇朗勦滅  
豐城克定蓋由儀同法甄之元功安西周敷之効力司  
勲有典懋賞斯舊惡直醜正自爲仇讐悖禮姦謀因此  
滋甚徵出湓城歷年不就求遣侍子累載未朝外誘連  
亡招集不逞中調京輦規冀非常擅斂征賦罕歸九府  
擁遏二賈害及四民潛結賊異共爲表裏同惡相求密



加應援謂我六軍薄伐三越未寧屠破迭城虜縛妻息  
分襲溢鎮稱兵蠡邦拘逼會豪攻圍城邑幸國有備應  
時劔殄假節通直散騎常侍仁武將軍尋陽太守懷仁  
縣伯華皎明威將軍廬陵太守益陽縣子陸子隆竝破  
賊徒剋全郡境持節散騎常侍安西將軍定州刺史領  
豫章太守西豐縣侯周敷躬枹溝壘身當矢石率茲義  
勇以寡摧衆斬馘萬計俘虜千羣迪方收餘燼還固壙  
堞使持節安南將軍開府儀同三司高州刺史新建縣  
侯法艷雄績早宣忠誠夙著未奉王命前率義旅旣援  
敷等又全子隆裹糧擐甲仍躡飛走批熊之旅驅馳越

電振武之衆叱咤移山以此追奔理無遺類雖復朽株  
將拔非待尋斧落葉就殞無勞烈風但去草絕根在於  
未蔓撲火止燎貴乎速滅分命將帥寔資英果今遣鎮  
南儀同司馬湘東公相劉廣德兼平西司馬孫曉北新  
蔡太守魯廣達持節安南將軍吳州刺史彭澤縣侯魯  
悉達甲士萬人步出興口又遣前吳興太守胡櫟樹功  
將軍前宣城太守錢法成天門義陽二郡太守樊毅雲  
塵將軍合州刺史南固縣侯焦僧度嚴武將軍建州刺  
史辰縣子張智達持節都督江吳二州諸軍事安南將  
軍江州刺史安吳縣侯吳明徹樓艦馬步直指臨川前



安成內史劉士京巴山太守蔡僧貴南康內史劉峯廬  
陵太守陸子隆安成內史闕慎竝受儀同法甄節度同  
會故郡又命尋陽太守華皎光烈將軍巴州刺史潘純  
施平西將軍郢州刺史欣樂縣侯章昭達竝率貔豹逕  
造賊城使持節散騎常侍鎮南將軍開府儀同三司湘  
州刺史湘東郡公度分遣偏裨相繼上道戈船蔽水鼓  
騎彌山又詔鎮南將軍開府儀同三司歐陽頎率其子  
弟交州刺史盛新除太子右率遂衡州刺史侯曉等以  
勁越之兵踰嶺北邁千里同期百道俱集如脫穉誅更  
淹旬晦司空大都督安都已平賊異凱歸非久飲至禮

畢乘勝長驅勦撲凶醜如燎毛髮已有明詔罪唯躄身  
黎民何辜一皆原宥其有因機立功賞如別格執迷不  
改刑茲罔赦吳明徹至臨川令衆軍作連城攻廸相拒  
不能尅世祖乃遣高宗總督討之廸衆潰妻子悉擒乃  
脫身踰嶺之晉安依于寶應寶應以兵資廸留異又遣  
第二子忠臣隨之明年秋復越東興嶺東興南城永成  
縣民皆廸故人復共應之世祖遣都督章昭達征廸廸  
又散于山谷初侯景之亂也百姓皆棄本業羣聚爲盜  
唯廸所部獨不侵擾竝分給田疇督其耕作民下肆業  
各有贏儲政教嚴明徵斂必至餘郡乏絕者皆仰以取



給廸性質朴不事威儀冬則短身布袍夏則紫紗袪腹  
居常徒跣雖外列兵衛內有女伎接繩破篋傍若無人  
然輕財好施凡所周贍毫釐必鈞訥於言語而襟懷信  
實臨川人皆德之至是竝共藏匿雖加誅戮無肯言者  
昭達仍度嶺頓于建安與陳寶應相抗廸復收合出東  
興時宣城太守錢肅鎮東興以城降廸吳州刺史陳詳  
率師攻廸詳兵大敗虔化侯陳諺陳留太守張遂竝戰  
死於是廸衆復振世祖遣都督程靈洗擊破之廸又與  
十餘人竄于山穴中日月轉久相隨者亦稍苦之復遣  
人潛出臨川郡市魚鮓足痛舍於邑子邑子告臨川太

守駱牙牙執之令取廸自効因使腹心勇士隨入山中  
誘廸出獵伏兵於道傍斬之傳首京都梟于朱雀觀三  
日

留異東陽長山人也世爲郡著姓異善自居處言語醜  
藉爲鄉里雄豪多聚惡少陵侮貧賤守宰皆患之梁代  
爲蟹浦戍主歷晉安安固二縣令侯景之亂還鄉里召  
募士卒東陽郡丞與異有隙引兵誅之及其妻子太守  
沈巡援臺讓郡於異異使兄子超監知郡事率兵隨巡  
出都及京城陷異隨臨城公蕭大連大連板爲司馬委  
以軍事異性殘暴無遠畧督責六連軍主及以左右私



樹威福衆竝患之會景將軍宋子仙濟浙江異奔還鄉里尋以其衆降于子仙是時大連亦趣東陽之信安嶺欲之鄱陽異乃爲子仙鄉導令執大連侯景署異爲東陽太守收其妻子爲質景行臺劉神茂建義拒景異外同神茂而密契於景及神茂敗績爲景所誅異獨獲免侯景平後王僧辯使異慰勞東陽仍糾合鄉閭保據巖阻其徒甚盛州郡憚焉元帝以爲信安令荊州陷王僧辯以異爲東陽太守世祖平定會稽異雖轉輸糧饋而擁擅一郡威福在已紹泰二年以應接之功除持節通直散騎常侍信武將軍縉州刺史領東陽太守封永興縣侯邑五百戶其年遷散騎常侍信威將軍增邑三百戶餘竝如故又以世祖長女豐安公主配異第三子貞臣永定二年徵異爲使持節散騎常侍都督南徐州諸軍事平北將軍南徐州刺史異遷延不就世祖卽位改授都督縉州諸軍事安南將軍縉州刺史領東陽太守異頻遣其長史王漸爲使入朝漸每言朝廷虛弱異信之雖外示臣節恒懷兩端與王琳自鄱陽信安嶺潛通信使王琳又遣使往東陽署守宰及琳敗世祖遣左衛將軍沈恪代異爲郡實以兵襲之異出下淮抗禦恪與戰敗績退還錢塘異乃表啓遜謝是時衆軍方事湘郢



乃降詔書慰喻且羈縻之異亦知朝廷終討於已乃使  
兵戍下淮及建德以備江路湘州平世祖乃下詔曰昔  
四罪難弘大媯之所無赦九黎亂德少昊之所必誅自  
古皇王不貪征伐苟爲時蠹事非獲已逾賊留異數應  
亡滅繕甲完聚由來積年進謝羣龍自躍於千里退懷  
首鼠恒持於百心中歲密契番禺既弘天網賜以名爵  
敦以國姻儻望懷音猶能革面王琳竊據中流翻相應  
接別引南川之嶺路專爲東道之主人結附凶渠唯欣  
禍亂旣祆氛盪定氣沮心孤類傷鳥之驚弦等窮獸之  
謀觸雖復遣家人質子陽之能轉道侍子還朝隗囂之  
心方熾朕志相成養不計疵慝披襟解帶敦喻殷勤蜂  
目彌彰梟聲無改遂置軍江口嚴戍下淮顯然反叛非  
可容匿且縉邦膏腴稽南殷曠永割王賦長壅國民竹  
箭良材絕望京輦萑蒲小盜共肆貪殘念彼餘曠兼其  
慨息西戎屈膝自款重關秦國依風竝輸侵地三邊已  
又四表咸寧唯此微妖所宜清殄可遣使持節都督南  
徐州諸軍事征北將軍司空南徐州刺史桂陽郡開國  
公安都指往擒戮罪止異身餘無所問異本謂官軍自  
錢塘江而上安都乃由會稽諸暨步道襲之異聞兵至  
大恐棄郡奔于桃支嶺於嶺口立柵自固明年春安都



大破其柵異與第二子忠臣奔于陳寶應於是虜其餘  
黨男女數千人天嘉五年陳寶應平并擒異送都斬于  
建康市子姪及同黨無少長皆伏誅唯第三子貞臣以  
尚主獲免

陳寶應晉安侯官人也世爲閩中四姓父羽有材幹爲  
郡雄豪寶應性反覆多變詐梁代晉安數反累殺郡將  
羽初竝扇惑合成其事後復爲官軍鄉導破之由是一  
郡兵權皆自己出侯景之亂晉安太守賓化侯蕭雲以  
郡讓羽羽年老但治郡事令寶應興兵是時東境饑饉  
會稽尤甚死者十七八半民男女竝皆自賣而晉安獨

豐沃寶應自海道寇臨安永嘉及會稽餘姚諸暨又載  
米粟與之貿易多致玉帛子女其有能致舟乘者亦竝  
奔歸之由是大致貲產士衆彊盛侯景平元帝因以羽  
爲晉安太守高祖輔政羽請歸老求傳郡于寶應高祖  
許之紹泰元年授壯武將軍晉安太守尋加員外散騎  
常侍二年封侯官縣侯邑五百戶時東西嶺路寇賊擁  
隔寶應自海道趨于會稽貢獻高祖受禪授持節散騎  
常侍信武將軍閩州刺史領會稽太守世祖嗣位進號  
宣毅將軍又加其父光祿大夫仍命宗正錄其本系編  
爲宗室并遣使條其子女無大小竝加封爵寶應娶留



異女爲妻侯安都之討異也寶應遣助之又資周迪兵糧出寇臨川及都督章昭達於東興南城破迪世祖因命昭達都督衆軍由建安南道渡嶺又命益州刺史領信義太守余孝頃都督會稽東陽臨海永嘉諸軍自東道會之以討寶應弁詔宗正絕其屬籍於是尚書下符曰告晉安士庶昔隴西旅拒漢不稽誅遼東叛換魏申宏畧若夫無諸漢之策勲有扈夏之同姓至於納吳濩之子致橫海之師違妣啓之命有甘誓之討况迺族不繫於宗盟名無紀於庸器而顯成三叛豐深四罪者乎案閩寇陳寶應父子卉服支孽本迷愛敬梁季喪亂閩隅阻絕父旣豪俠扇動蠻獫椎髻箕坐自爲渠帥無聞訓義所資姦諂爰肆蜂豺俄而解印炎行方謝網漏吞舟日月居諸棄之度外自東南王氣寔表聖基斗牛聚星允符王迹梯山航海雖若款誠擅割瓌珍竟微職貢朝廷遵養含弘寵靈隆赫起家臨郡兼畫繡之榮裂地置州假藩麾之盛卽封戶牖仍邑櫟陽乘華轂者十人保弊廬而萬石又以盛漢君臨推恩婁敬隆周朝會迺長滕侯由是紫泥青紙遠賁恩澤鄉亭龜組頒及嬰孩自谷遷喬孰復爲擬而苞藏鳩毒敢行狼戾連結留異表稟周迪盟歆婚姻自爲脣齒屈彊山谷推移歲時及



我穀騎防山定秦望之西部戈船下瀨克匯澤之南川  
遂敢舉斧竝助凶孽莫不應弦摧衄盡殪醜徒每以罪  
在會渠憫茲驅逼所收俘馘竝勒矜放仍遣中使爰降  
詔書天網恢弘猶許改思異旣走險廸又逃刑誑侮王  
人爲之川藪遂使袁熙請席遠歎頭行馬援觀蛙猶安  
井底至如遇絕九賦剽掠四民闔境資財盡室封奪凡  
厥倉頭皆畧黔首蝥賊相扇叶契連蹤乃復踰超瀛溟  
寇擾浹口侵軼嶺嶠掩襲述城縛掠吏民焚燒官寺此  
而可縱孰不可容今遣沙州刺史俞文罔明威將軍程  
文季假節宣猛將軍成州刺史甘他假節雲旗將軍譚

頊假節宣猛將軍前監臨海郡陳思慶前軍將軍徐智  
遠明毅將軍宜黃縣開國侯慧紀開遠將軍新除晉安  
太守趙彖持節通直散騎常侍壯武將軍定州刺史康  
樂縣開國侯林馮假節信威將軍都督東討諸軍事益  
州刺史余孝頃率羽林二萬蒙衝蓋海乘跨滄波掃蕩  
巢窟此皆明恥教戰濡須鞠旅累從楊僕亟走孫恩斬  
蛟中流命馮夷而鳴鼓龜鼉爲駕轡方壺而建旗義安  
太守張紹賓忠誠款到累使求軍南康內史裴忌新除  
輕車將軍劉峯東衡州刺史錢道戢竝卽遣人仗與紹  
賓同行故司空歐陽公昔有表奏請宣薄伐遙途意合



若伏波之論兵長逝遺誠同子顏之勿赦征南嘉謝上策無忘周南餘恨嗣子弗忝廣州刺史歐陽紇克符家聲聿遵廣畧舟師步卒二萬分趨水扼長鯨陸掣封豨董率衡廣之師會我六軍潼州刺史李膺明州刺史戴晃新州刺史區白獸壯武將軍脩行師陳留太守張遂前安成內史闕慎前廬陵太守陸子隆前豫章太守任蠻奴巴山太守黃法慈戎昭將軍湘東公世子徐敬成吳州刺史魯廣達前吳州刺史遂興縣開國侯詳使持節都督征討諸軍事散騎常侍護軍將軍昭達率緹騎五千組甲二萬直渡邵武仍頓晉安按轡揚旌夷山堙谷指期倚角以制飛走前宣威太守錢肅臨川太守駱牙太子左衛率孫詡尋陽太守莫景隆豫章太守劉廣德竝隨機鎮遏絡驛在路使持節散騎常侍鎮南將軍開府儀同三司江州刺史新建縣開國侯法甄戒嚴中流以爲後殿斧鉞所臨罪唯元惡及留異父子其黨主帥雖有請泥函谷相背淮陰若能翻然改圖因機立効非止肆青仍加賞擢其建晉士民久被驅迫者大軍明加撫慰各安樂業流寓失鄉卽還本土其餘立功立事已具賞格若執迷不改同惡趨起斧鉞一臨罔知所赦昭達旣剋周迪踰東嶼嶺頓于建安余孝頃又自臨海



道襲于晉安寶應據建安之湖際逾拒王師水陸爲柵  
昭達深溝高壘不與戰但命軍士伐木爲籬俄而水盛  
乘流放之突其水柵仍水步薄之寶應衆潰身奔山草  
間窘而就執并其子弟二十人送都斬于建康市

史臣曰梁末之災沴羣凶競起郡邑巖穴之長村屯鄔  
壁之豪資剽掠以致彊恣陵侮而爲大高祖應期撥亂  
戡定安輯熊曇朗周迪留異陳寶應雖身逢興運猶志  
在亂常曇朗姦慝翻復夷滅斯爲幸矣寶應及異世祖  
或敦以婚姻或處其類族豈有不能威制蓋以德懷也  
遂乃背恩負義各立田兵圖地匪淮南有爲帝之志勢非  
庸蜀啓自王之心嗚呼旣其迷暗所致五宗屠戮宜哉



陳書卷三十六

列傳第三十

唐散騎常侍姚思廉撰

始興王叔陵

新安王伯固

始興王叔陵字子嵩高宗之第二子也梁承聖中高宗在江陵為直閣將軍而叔陵生焉江陵陷高宗遷關右叔陵留于穰城高宗之還也以後主及叔陵為質天嘉

康熙二十五年重修

列傳



三年隨後主還朝封康樂侯邑五百戶叔陵少機辯狗  
聲名疆梁無所推屈光大元年除中書侍郎二年出爲  
持節都督江州諸軍事南中郎將江州刺史太建元年  
封始興郡王奉昭烈王祀進授使持節都督江郢晉三  
州諸軍事軍師將軍刺史如故叔陵時年十六政自己  
出僚佐莫預焉性嚴刻部下懾憚諸公子姪及罷縣令  
長皆逼令事已豫章內史錢法成詣府進謁卽配其子  
季卿將領馬仗季卿慙恥不時至叔陵大怒侵辱法成  
法成憤怨自縊而死州縣非其部內亦徵攝案治之朝  
貴及下吏有乖忤者輒誣奏其罪陷以重辟尋進號雲

麾將軍加散騎常侍三年加侍中四年遷都督湘衡桂  
武四州諸軍事平南將軍湘州刺史侍中使持節如故  
諸州鎮聞其至皆震恐股慄叔陵日益暴橫征伐夷獠  
所得皆入己絲毫不以賞賜徵求役使無有紀極夜常  
不卧燒燭達曉呼召賓客說民間細事戲謔無所不爲  
性不飲酒唯多置餽戴晝夜食噉而已自旦至中方始  
寢寐其曹局文案非呼不得輒自呈答罪者皆繫獄動  
數年不省視瀟湘以南皆逼爲左右壘里殆無遺者其  
中脫有逃竄輒殺其妻子州縣無敢上言高宗弗之知  
也尋進號鎮南將軍給鼓吹一部遷中衛將軍九年除



使持節都督揚徐東揚南豫四州諸軍事揚州刺史侍  
中將軍鼓吹如故十年至都加扶給油幢車叔陵治在  
東府事務多關涉省閣執事之司承意順旨卽諷上進  
用之微致違忤必抵以大罪重者至殊死道路籍籍皆  
言其有非常志叔陵脩飾虛名每入朝常於車中馬上  
執卷讀書高聲長誦陽陽自若歸坐齋中或自執斧斤  
爲沐猴百戲又好遊冢墓間遇有塋表主名可知者輒  
令左右發掘取其石誌古器并骸骨肘脛持爲翫弄藏  
之庫中府內民間少妻處女微有色貌者竝卽逼納十  
一年丁所生毋彭氏憂去職頃之起爲中衛將軍使持

節都督刺史如故晉世王公貴人多葬梅嶺及彭卒叔  
陵啓求於梅嶺葬之乃發故太傅謝安舊墓棄去安柩  
以葬其毋初喪之日僞爲哀毀自稱刺血寫涅槃經未  
及十日乃令庖厨擊鮮日進甘膳又私召左右妻女與  
之姦合所作尤不軌浸淫上聞高宗譴責御史中丞王  
政以不舉奏免政官又黜其典籤親事仍加鞭撻高宗  
素愛叔陵不繩之以法但責讓而已服闋又爲侍中中  
軍大將軍及高宗不豫太子諸王竝入侍疾高宗崩于  
宣福殿翌日旦後主哀頓俯伏叔陵以剉藥刀斫後主  
中項太后馳來救焉叔陵又斫太后數下後主乳媪吳



氏時在太后側自後掣其肘後主因得起叔陵仍持後  
主衣後主自奮得免長沙王叔堅手搯叔陵奪去其刀  
仍牽就柱以其褶袖縛之時吳媪已扶後主避賊叔堅  
求後主所在將受命焉叔陵因奮袖得脫突出雲龍  
門馳車還東府呼其甲士散金銀以賞賜外召諸王將  
帥莫有應者唯新安王伯固聞而赴之叔陵聚兵僅千  
人初欲據城保守俄而右衛將軍蕭摩訶將兵至府西  
門叔陵事急惶恐乃遣記室韋諒送其鼓吹與摩訶仍  
謂之曰如其事捷必以公爲台鼎摩訶給報之曰須王  
心膂節將自來方敢從命叔陵卽遣戴溫譚驎二人

詣摩訶所摩訶執以送臺斬於闕道下叔陵自知不濟  
遂入內沈其妃張氏及寵妾七人于井中叔陵有部下  
兵先在新林於是率人馬數百自小航渡欲趨新林以  
舟艦入北行至白楊路爲臺軍所邀伯固見兵至旋避  
入巷叔陵馳騎拔刀追之伯固復還叔陵部下多棄甲  
潰散摩訶馬客陳智深迎刺叔陵僵斃于地闍豎王飛  
禽抽刀斫之十數下馬客陳仲華就斬其首送于臺自  
寅至巳乃定尚書八座奏曰逆賊故侍中中軍大將軍  
始興王叔陵幼而狼戾長肆貪虐出撫湘南及鎮九水  
兩藩毗庶掃地無遺蜂目豺聲狎近輕薄不孝不仁阻



兵安忍無禮無義唯戮是聞及居偏憂姪樂自恣產子  
就館日月相接晝伏夜遊恒習姦詭抄掠居民歷發丘  
墓謝太傅晉朝佐命草創江左斷棺露骸事驚聽視自  
大行皇帝寢疾翌日未<sub>殯</sub>叔陵以貴介之地參侍醫藥  
外無戚容內懷逆弒大漸之後聖躬號擗遂因匍匐手  
犯乘輿皇太后奉臨<sub>以</sub>加鋒刃窮凶極逆曠古未儔賴  
長沙王叔堅誠孝懇至英果奮發手加挫拉身蔽聖躬  
叔陵仍奔東城招集兇黨餘毒方熾自害妻孥雖應時  
梟懸猶未撼憤怨臣等參議請依宋代故事流尸中江  
汗瀦其室并毀其所生彭氏墳廟還謝氏之塋制曰凶

逆梟獍反噬宮闈賴宗廟之靈時從殄滅撫情語事酸  
憤兼懷朝議有章宜從所奏也叔陵諸子即日竝賜死  
前衡陽內史彭暲諮議參軍兼記室鄭信中錄事參軍  
兼記室韋涼典籤俞公喜竝伏誅暲叔陵舅也初隨高  
宗在關中頗有勤効因藉叔陵將領歷陽衡陽二郡信  
以便書記有寵謀謨皆預焉涼京兆人梁侍中護軍將  
軍粲之子也以學業爲陵所引陳智深以誅叔陵之  
功爲巴陵內史封游安縣子陳仲華爲下雋太守封新  
夷縣子王飛禽除伏波將軍賜金各有差  
新安王伯固字宰之世祖之第五子也生而龜背目通



精揚白形狀眇小而俊辯善言論天嘉六年立爲新安郡王邑二千戶廢帝嗣立爲使持節都督南琅邪彭城東海三郡諸軍事雲麾將軍彭城琅邪二郡太守尋入爲丹陽尹將軍如故太建元年進號智武將軍尹如故秩滿進號翌右將軍尋授使持節都督吳興諸軍事平東將軍吳興太守四年入爲侍中翊前將軍遷安前將軍中領軍七年出爲使持節散騎常侍都督南徐南豫南北兗四州諸軍事鎮北將軍南徐州刺史伯固性嗜酒而不好積聚所得祿俸用度無節酣醉已後多所乞丐於諸王之中最爲貧窶高宗每矜之特加賞賜伯固

雅性輕率好行鞭撻在州不知政事日出田獵或乘眠輿至於草間輒呼民下從遊動至旬日所捕麀鹿多使生致高宗頗知之遣使責讓者數矣十年入朝又爲侍中鎮右將軍尋除護軍將軍其年爲國子祭酒領左驍騎將軍侍中鎮右竝如故伯固頗知玄理而墮業無所通至於擿句問難往往有奇意爲政嚴苛國學有情遊不脩習者重加橫撻生徒懼焉由是學業頗進十二年領宗正卿十三年爲使持節都督揚南徐東陽南豫四州諸軍事揚州刺史侍中將軍如故後主初在東宮與伯固甚相親狎伯固又善嘲謔高宗每宴集多引之叔



陵在江州心害其寵陰求疵瑕將中之以法及叔陵入朝伯固懼罪諂求其意乃共訕毀朝賢歷詆文武雖耆年高位皆面折之無所畏忌伯固性好射雉叔陵又好開發冢墓出遊野外必與偕行於是情好大叶遂謀不軌伯固侍禁中每有密語必報叔陵及叔陵出奔東府遣使告之伯固單騎馳赴助叔陵指揮知事不捷便欲遁走會四門已閉不得出因同趣白楊道臺馬客至爲亂兵所殺屍於東昌館門時年二十八詔曰伯固同茲悖逾殞身途路今依外議意猶弗忍可特許以庶人禮葬又詔曰伯固隨同巨逾自絕于天俾無遺育抑有恒興但童孺靡識兼預葭茅眞之旬人良以惻憫及伯固所生王氏可竝特宥爲庶人國除  
史臣曰孔子稱富與貴是人之所欲非其道得之不處也上自帝王至於黎獻莫不嫡庶有若長幼攸序叔陵險躁奔競遂行悖逆轅磔形骸未臻其罪汗瀦居處不足彰過悲哉

陳書卷三十六終



